

Abalamalam

Ana anebe Isreel gohro nok a anebe Kenan ba sa no

¹ Ngare nyio nyi Josua ma kpo, abone Isreel kehm bahbe Jehova re, "Anv, nne awoo bahk-r gboko mbang song nok a anebe Kenan?"

² Owo Jehova kehm faange re, "Nong et'tohngo ji Juda gboon mbang, m m-e kak edi ndi jia go ebo abo."

³ Et'tohngo ji Juda kehm tongo abonanyehn ba lohng go et'tohngo ji Simion re, "Ba tob-r nok a anebe Kenan ba wob go ejang ndi ji bo ka-r no, e bahke tob ba tob-n nok a anebe Kenan ba tob li go egahna ndi." Et'tohngo ji Simion kehm song tob bo.

⁴ Ana anebe Juda tahme ebta, Jehova kehm faake anebe Kenan, a anebe Peres kak bo go abo. Efung bio bo wulu ane atahltahl go eltahl a nkpel elon ejahbe jio ji Besek.

⁵ O wo bo nyehne nne no bo kpo lung-e re Adoni-Besek, kehm kehme elnoko a ne. Bo kame anebe Kenan, a anebe Peres yehke ajahbe nyao.

⁶ Adoni-Besek b'be. Bo kam-e song bob, fere kiimi anyohkobo nluumlum, a anyohkgung nluumlum.

⁷ Á kehm soro bung re, "Ana n kiimi atul atahl ara a atul awubu bao anyohkobo nluumlum, a anyohkgung nluumlum bo fere jo kpiimi nsol alehke go egame nla ekpukuru, ano wo Esowo

ma-m tob bongo." Bo ko-e ba go Jeusalem, owo á ba kpo.

⁸ Anebe Juda kpe sehng o song nok a Jeusalem, wul ane o kpee, fere jahm ejahbe jio fi.

⁹ Bo kpe sehng ona, song kehme elnoko a anebe Kenan ba lene go ero ewong, a adi nya li go elka emahng go ejang eboblum ejahbe jio, a akpe kpe awong nya li feere erede nfam.

¹⁰ Bo soro asi ona, song nok a anebe Kenan ba lene go ejahbe ji bo kpo lung re Hebron (bo tohko jo lung ejahbe jio re, Kiriát Aba) bo tob , ga Sesayi, a Ahiman, ngo Talmayi

¹¹ Bo kpe sehng o nok anebe Diber (bo tohko jo lung ejahbe jia re, Kiriát Sefer).

¹² Eji bo ba ebyele ejahbe jio, Keleb tongo abone Isreel re, "Nne awohng awohng no bahke noko a Kiriát Sefer fere sehng bo, m bahk-e kake Akisa mmon ewame no nkal á ko-e go elbal."

¹³ Otinel, mmon no Kenas, ji jolo mmonan-nyehna Keleb no nse, song noko a bo, sehng ejahbe jio. Keleb kehm faake mmon ewe Akisa ka-e go elbal.

¹⁴ Efung abehng Akisa kehm buntu tong Otinel nlum we re, song bahb nsuo, á ka-a edi egbe. Eji bo song rehng eji nde, Akisa badde kan a me go njahm eny' nya, nde kehm-e bahbe re, "Anv, me n lim jen ka-a?"

¹⁵ Á kehm faange nde re, "Eji a ma-m ka ndi go ejang eboblum bi alahb ki li, tob ka-m edi go ejang bio bi alahb li gbalee." Nde kehm-e kake mbingilahb nyi li go ero egbe, a nnahb gbe.

¹⁶ Et'tohngo jio ji nde nkala Mosis, nne a Ken

mehle go ejahbe ji bo jo lung re, ejahbe nsakoro ji bo kpo lung re Jeriko. Bo tahme toono anebe Juda re bo song lene a bo kohlo Arad ji jolo go elka emahng Juda ji li go elka emahng ejang eboblum,

¹⁷ Anebe Juda kehm tob tahm song tob abo-nanyehn, anebe Simion, bo song nok a anebe Kenan ba jolo go Sefat bo ranng ejahbe jio kpee a ane ba lene o kpee. Bo lungu ejahbe jio re Homa (ji lohngo re elranng).

¹⁸ Anebe Juda kehm noko ebta fere sehng Gasa, Askelon, Ekron, fere taare ndi bo kpee.

¹⁹ Jehova jolo a anebe Juda. Bo taare ajahbe kpee nya kuumu go ero awong. Wo ajahbe nya jolo go ebal, bo maam kam bo, tib bo bele amvtv ebta nya jolo akuungu akuungu nya any'nya jo tohng.

²⁰ Tib go enyam bi Mosis, bo faake Hebron ka Keleb, ye wo kame abon ba Anak na ara yehke go ejahbe jia.

²¹ Anebe Benjamin ana jolo o, bo maam kam anebe Jebus, ba jolo go Jeusalem, tete rehng efung bia. Bo baa kpe lene go ellong ni anebe Benjamin.

²² Et'tohngo ji Josef ba noko ebta a ejahbe ji bo kpo lung re Betel, Jehova jolo a bo.

²³ Bo tumu anebe mbehrbehr re bo song weele feede Betel (Betel bo jo lungu re Lus wuku wuku).

²⁴ Anebe mbehr mbehr bao kehm wane nne no kp'lohngo abake go ejahbe jio, bo kehm-e tongo re, "Tib-r mbang nyi e bahke yele go ejahbe jia, a l'tib-r e wa nehm lim ebi ajehng ajehng."

²⁵ Owo á kehm tibi bo mbang bo kehm wulu ane kpee ba li go ejahbe jio, sehngem nne no tibi

bo mbang, a ebangenahb eje kpee.

²⁶ Nne noa no tibi bo mbang mehle tahm go ndi nyi anebe Hit. Á si ejahbe o, ji á gungu mbing re Lus, mbing nyio nyi bo kpo lung ejahbe jio tete rehng lela.

²⁷ Et'tohngo Manase tobem kam ane ba jolo go Bet San, Taanak, Dor, Iblem, Megido, a ane ba lene sennge ajahbe nyao, tibre anebe Kenan yehke ntir ebo re bo bahke tiki jol o.

²⁸ Ngare nyia Isreel bele atahne, bo kamem anebe Kenan yehke kpe kpe, Isreel limi bo bo jol aju jo lim ntum ka bo.

²⁹ Jol Efrem tobem kam anebe Kenan ba jolo go Gesar, bo soro asi jo lene a bo.

³⁰ Et'tohngo Sebulon fvfo tobem kam anebe Kenan ba jolo go Kitron, afi Nahalol, bo yake bo re bo lene a bo,wo, go ebo eko, bo rod bo bum aju, jo lim ntum ka bo.

³¹ Jol et'tohngo Aser kamem anebe Kenan ba jolo go Ako, Sidon, Ahlab, Aksib, Helbbah, Afek, a Rehob.

³² Tib esi jio wo et'tohngo Aser lene edi ajehng a anebe Kenan ba jolo o.

³³ Et'tohngo Naftali fvfo kamem anebe Kenan ba lene go Bet Semesh, afi Bet Anat, anebe Naftali tob lene tob anebe Kenan ba jolo afono ejahbe. Anebe Naftali go ebo eko rodo anebe Kenan ba lene go Bet-Semesh, a Bet Anat, bum aju, jo lim ntum .

³⁴ Anebe Amor sahde et'tohngo ji Dan tv go ero ewong, bo kpeem jo taame re bo badde ba ga ebal.

³⁵ Anebe Amor tob jabbe t'tahne ewong ji Heres, a ejahbe ji bo kpo lung re Aijalon, a Saal-

bim, eji et'tohngo ji Josef ba bel atahne sehng bo, bo fere jabbe bo jol aju, jo lim ntum ka bo.

³⁶ Nseenge nyi anebe Amor bomo go mmon ntoora mbang no bo kpo lung re Akrebim, no li go eyake awong. Soro asi ano tete rehng go Sela asongo.

2

Enjel nyi Esowo ba go Bokim

¹ Enjel nyi Jehova mehle go Gilgal tahm go Bokim, kehm bungu tong anebe Isreel re, "N yehk-n go Ijib, fere tv-n ba rehng edi ndi ji n nyame tong bahbnso ejahne re m bahke bo ka. M bung tong bo re, 'N nehm tiki ranng egbanngalung a nahne,

² wahn fvfo kana tiki lim egbanngalung ajehng ajehng a ane ba lene go edi jia, waan agudu njom ebo.' M m-e wukem. Jenji wahng e n limi ano?

³ Anv, n kp-n tongo re, n nehm tiki kam bo yehke go egahne ellong, bo bahke jolo ana ajoongo ka-n, asowo ebo bahke jolo akpoko fvfo."

⁴ Eji Enjel ma bung nsol nyia kpee tong abone Isreel, bo kehm kehme ellingi wahre wahre.

⁵ Bo kehm soro lung edi jio re Bokim (ji lohngo re abalingaling). Owo bo limi ajom gbalee ka Jehova.

Ek'wuk, a elgake

⁶ Eji Josua ma yaame anebe Isreel kpee, no nne feere song yel go edi elehkekv eje.

⁷ Nne awohng awohng jo kake Esowo go ngare nyi Josua kpaka li go elkpín, a anebekul ba kpe

jol ngare nyi Josua ma kpo, bo ji nyehne akpokosi nya Esowo ma lim ka anebe Isreel.

⁸ Josua mmon no Nun, nlokeltuma Jehova tahme ebim ejok eji á ma kang nnya atahl alon a nnya ewubu.

⁹ Bo kpa-e kak go edi ji á li elkv, ji bo kpo lung re, Timnat Heres, ji jolo go ejahbe awong ji Efrem, ejang ebobkal bi ewong Gaas.

¹⁰ Eji eying jio ji Josua ma kpo kpee mal, owo eying ji nfenfe kehm kpe ba ji ki kahn Jehova, jol nsol enye nyi á ma lim ka anebe Isreel nnene kahnem.

¹¹ Bo limi abiafem gbalee go esamahr Esowo, fere jo loko Baal.

¹² Bo tene Jehova, Esowo bio bi babnde ebo, ye ji yehke bo go ndi nyi Ijib. Bo tahme toono, jo loko asowo nya ane ba lene sennge bo kak. Bo limi Jehova jol erakatahng a bo,

¹³ tib eji bo ten-e no, fere jo loko Baal, a asowo nya Asterot.

¹⁴ Go erakatahng ji Jehova bele a Isreel, á tumu ane ba kpo da nsol tv bo, bo ba taare nsol ebo kpee. Á tob faake bo kak anebekv kpee ba li sennge bo go abo. Bo maam kpe yiimi bo go abo.

¹⁵ Ngare anyehng anyehng nyi Isreel lohngo tahm ebta, erakatahng ji Jehova ji jo toono bo, jang jang ana á nyame no. Ejum ajehng ajehng joom kpe nob a bo.

¹⁶ Owo Jehova kehm yehke abalamalam ba tahre bo yehke go abo ane ba jo da bo nsol.

¹⁷ Tvtv o, bo joom wuk abalamalam bao, bo kpe jo soro na asi, jo toono asowo nyako fere jo kak

bo. Bo ware elyake mbang nyi babnde ebo sehng, bo ji jo kpunu atahm nya Jehova.

¹⁸ Ngare anyehng anyehng nyi Jehova l'yehke nlamalam no bahke fili bo, á bahke jolo a ne, fere tahre anebe Isreel yehke go abo anebekv ebo, ngare nyio kpee nyi nlamalam noo kpeka li go elkpin. Tibre jo fili Jehova ndon sehng tib go elnohko, a arem nya abone Isreel jo nyehn fere jo r'ruunu go abo nya anebekv ebo.

¹⁹ Nlamalam noo l'kpo, abone Isreel kpe fere jo lim ab'bi nya sehng nya babnde ebo jo lim, jo toono, jo kak, fere jo loko asowo nyako. Bo tene elyake abi abang ebo.

²⁰ Erakatahng ji Jehova kpe gbal na bada Isreel. Owo á kehm bungu re, "Tib eji ejahbe jia ma ten egbanngalung ejame ji n limi a babnde ebo, eji bo kiim wuungu atung,

²¹ n nehm kpe kam ajahbe nyao kpee nya Josua ki kam bo kehm kpoko.

²² Bo ba n bahke koko wuungu anebe Isreel, ejoare bo bahk-m toono ana babnde ebo toon-m no."

²³ Jehova yake ajahbe nyao bum, tib esi jia. Owo wahngé á ki kam bo nkpel nkpel anyehng sehng go abo nya Josua.

3

Ajahbe nya sa no go ndi nyi Kenan

¹ Ajahbe nya a nya Jehova yake no re bo jol, eji á l' ko bo jo wuungu Isreel jio ji ki kahn bade ebta abehng abehng bi jolo Kenan.

² Jehova limi jia, eji abone Isreel ba ki nyi ebta, l'kpili bade ebta.

³ Ajahbe nyao nya a; Atul na alon ba anebe Filistia, anebe Kenan kpee, anebe Sidon, a anebe Hiv, bo ji lene go awong nyao nya Lebanon, bomo go ewong ji Baal Hemon song rehng go nnyo ewong ji Lebo Hamat.

⁴ Bo sa o, eji Jehova l'ko bo jo wuungu Isreel, ejoare Isreel bahke kpunu atahm nya á ka babnde ebo sehng go abo nya Mosis.

⁵ Ane ba a, ba abone Isreel lene a bo, anebe Kenan, anebe Hit, anebe Amor, anebe Peres, anebe Hiv, a anebe Jebus.

⁶ Abone Isreel ko mbal semme na semme a bo, fere jo kak asowo ebo.

Ot'niel, ngbokambang a nne no lame Isreel

⁷ Abone ba Isreel limi abiafem go esamahr bi Jehova. Bo yini Jehova Esowo ebo, fere tahm jo loko asowo, Baal abola Asera.

⁸ Jehova kehm bele egburu erakatahng bada anebe Isreel kehm faake bo kak ntul no Aram Naharim go ebo, no bo jo lung-e re Kusan-Risatem, ye wo Isreel jolo aju enye go nnya enehkeni.

⁹ Eji anebe Isreel lingi tong Jehova re á tob bo, owo á kehm yehke nnenlum awohng, re á song tahre bo. Bo jo lung-e re Ot'niel, á jolo mmona mmonannyehn no Keleb no nse, no bo jo lung-e re Kenas.

¹⁰ Etohko ji Jehova kehm ba jol a ne, á jol nne no bahke lame Isreel. Á kehm ba tahm ebta, song nok a ntula Kusan Risatem, ye ji jolo ntul no Aram. Esowo ka Ot'niel esehngebta go abohng nyao.

¹¹ Elkoono jolo ejahbe jio nnya atahl abal, tete Ot'niel ji mmona Kenas kpo.

Ehud, etoono nlamalam no Isreel

¹² Owo abone Isreel kehm kpe lim abiafem go esamahr bi Jehova. Tib go esi abiafem ebo, Jehova ka ntula Moab nsahm, no bo jo lung-e re Eglon á ba nok sehngre Isreel.

¹³ Ntul noa ko anebe Amon, a anebe Amalek budu elne, ba nok a Isreel, taare bo Jeriko ejahbe nsakoro.

¹⁴ Anebe Isreel jolo aju ka Eglon ntul no Moab go elku a nnya era.

¹⁵ Eji abone Isreel lingi tong Jehova re á kak bo ebo. Á kehm kake bo nnenlum awohng no jo lim ebobkal, no bo jo lung-e re Ehud mmon no Gera, á lohng go et'tohngo ji Benjamin. Abone Isreel kehm-e kake akpohko etak re á song ka Eglon ntula Moab.

¹⁶ Ehud limi ekahngkahng njahmbal, labe ana eyake ebnyohkobo ebbal. Á rodo gba go eyo ji ejang eboblum, kak nsol bulu.

¹⁷ Á song faake akpohko nyao kpee ka Eglon, Eglon jolo njokojoka nne.

¹⁸ Eji Ehud m-e ka akpohko nyao, á kehm feere song tv ane ba solo akpohko nyao ba a nya.

¹⁹ Eji á song rehng edi ji bo jo ko atal ramme asowo, kohlo Gilgal, owo á kehm feere ba kpiri ntula Eglon kehm-e tongo re, "Nsoo ntul, n kpi etib bi m bahk-a tongo mbehrmbehr." Ntul kehm tongo ane ba kpo lok-e re , 'Tohk-m ka wahn eyake.' Bo kehm mehle lohng alatahk.

²⁰ Ntul jii antahng go ekp'kpa ji kp'naange go ero nkimi nyi li ege etahk, owo Ehud kehm jeere kohl-e, kehm-e tongo re, "N ko etib bi lohng goji Esowo re me m ba ka-a. Ana ntul mehle go ege eti,

²¹ ano wo Ehud kehm koko ebobkal wob ekahngkahng ebe go eyo eboblum, kehm jahme ntul ekahngkahng bio sa o ,

²² lahme tete ekpare yel go atahng, afom tahl bulu. Ano wo Ehud yake ekahngkahng bio sa-e go ala, lahme tete bohngo njahm*.

²³ Ehud kehm bame abu nyao nya eyong, fere ta, fere sehng nkpaame nkpaame badde eje tahm.

²⁴ Eji Ehud ma tahm, owo alokeltum ntul feere no ba, kehm ba nyehn abutahk bo ma ta. Ntir atahng nyi bo jolo re, "Yebtahm esuku go nkimi nyi atahng."

²⁵ Eji bo ma sik ekidi ma lab, ntul ki lennge mbutahk, limi bo ndon, bo kehm ba rod egbokoro, ba lennge abu, nyehn ntula bo nong go ndi ma kpo.

²⁶ Ngare nyio nyi alokeltum ji jo sik nyi nyi Ehud be for. Á song sehng edi atal ji bo jo ramme elokelom sa, song rehng go Seira.

²⁷ Eji á rehng , á kehm woro ntang, anebe Isreel kehm lohngo gbalee, á kehm gboko bo mbang jo badde asongo.

²⁸ Á kehm tongo bo re, "Toon-m wahn, Jehova ebfaake anebe Moab ba li anebekv ebahne kak-r go abo." Bo kehm-e toono song taare elga anehng anehng ni bo kpo siiri aya ma Jodan tahm go

* **3:22 3:22** Afii "abahng bohngo."

Moab, re nne ekv awohng awohng k'siiri.

²⁹ Ano wo bo noko a anebe Moab, fere wul ane atahltahl go eltahl a nkpel elon. Ane bao ba jolo nsoja ebo nyi jo sahb t'tahne. Nne awohng awohng go ebo ellong forem.

³⁰ Efung bio bi, anebe Isreel ga anebe Moab, anebe Moab fere jol aju ka bo, bomo ngare nyio asongo anebe Isreel jolo go elkoono nnya atahl ani.

Samga wo biingi ane ara ba lame anebe Isreel

³¹ Eji Ehud ma kpo, Samga mmon no Anat wo tob ba lam anebe Isreel. Ye fvfo tob tahre anebe Isreel. Á ko ehti bi bo kpo jamme adamagbudu, wul ane atahltahl, atahl awubu ba Filistia.

4

Debora wo biingi ane ani ba lame Isreel

¹ Eji Ehud ma kpo, abone Isreel kpe feere song kehme ab'bi lim go esamahr bi Jehova.

² Jehova faake bo ka ntula Kenan, no bo jo lung-e re Jabin ji lohng go Hasor. Ntubesi nnea nsoja ewe, bo jo lung-e re Sisera, á jolo go ejahbe ji bo jo lung re Haroset Hagoyim.

³ Sisera bele amvtv ebta nya bo limi akuungu akuungu nya any'nya jo tohng, nya jolo amvtv atahltahl nkpel ebal a amvtv atahl alon. Á nohko abone Isreel go nnya eltahl. Abonee Isreel kehm lingi tong Jehova re á kak bo ebo.

⁴ Ngare nyia Debora nnyehnamahr no jolo nkala Lapidot, ye wo jo lam Isreel.

⁵ Á jo lame ane go ala nsakoro nya Debora, edi ji jolo elka elka ni ejahbe ji Rama a Betel, edi ndi ji

Efrem ji jolo awong awong, edi jio ji anebe Isreel kpee jo ba kpir-e á jo toobo atong tong ebo.

⁶ Efung abehng á kehm tumu tv Barak mmona Abinoam, ye ji jolo go ejahbe ji Kedesh ji li go edi ndi ji Naftali. Á kehm-e tongo re, "Ejum ji a, ji Jehova, ye ji li Esowo bi Isreel kpa-a tongo re wo tiki lim: 'Song wo song yehke anebelum atahltahl go eltahl a nkpel elon, bo ji li atakuru, go et'tohngo ji Naftali, a ji Sebulon, wo tahm abo go ewong ji bo kpo lung re Tabor.

⁷ M bahke melle Sisera ntubesi nne a nsoja no Jabin go eltim re á rod amvtv ebta enye, a abanokebta ebe, ba wan-n go aya ma Kison. O wo m bahk-e faake kak-a go ebo, a sehng-e go ebta.'

⁸ Barak kehm-e faange re, "A tohk-m toono me n nehm je, a l'toon-m, m bahke jeke."

⁹ Debora kehm-e tongo re, "Ebnob sehng, m bahke jeke a na. Eji a ma yiimi re me m ba, ekpunu nehm jol j'ja. Nnenkal wo Jehova bahke faake Sisera kak-e go abo." Debora kehm toono Barak tahm go Kedesh.

¹⁰ Eji bo rehng go Kedesh, Barak kehm kuku et'tohngo ji Sebulon, a ji Naftali, anebelum atahltahl eltahl a nkpel elon, bo lohng toon-e tahm ebta. Debora fvfo t'tob je a bo.

¹¹ Ngare nyia Heber ji lohng go ebangenahb ji Ken, á lohng go et'tohngo ji Hobab, nnar a Mosis, yeblohng go elwo ni ane ebe song si etahk go egburu nnahb eti nyi li go Saananim ji li kohko Kedesh.

¹² Eji bo tongo Sisera re Barak mmona Abinoam ebrehng go ewong ji Tabor,

13 á kehm rodo abanokebta ebe, a amvtv akuungu akuungu nya á jo ko nok ebta, jolo mmvtv atahltahl nkpel ebal, a mmvtv atahl alon. Bo bomo eljen ebo go ejahbe ji bo kpo lung re Haroset Hagoyim asongo go aya ma Kison.

14 Owo Debora kehm tongo Barak re, "Toobo ebjing. Lela Jehova ma-a gbo mbang, yebfaake Sisera kak-a go ebo, ebta bia." Barak kehm soro mehl a nsoja enye, bo jolo asoja atahltahl eltahl, a nkpel elon, fere jo badde ewong Tabor asongo go edi ebta.

15 Ana Barak bomo ebta, Jehova kehm kake Sisera elsemme go ellong nsoja enye, a amvtv ebta enye bo be faade. Tete yefono Sisera yehb gbo go ege mmvtv ebta nyi á woomo no, be akpade akpade akpade.

16 Owo Barak kehm kehme nsoja enye kam, a amvtv ebta ebo, mbang mbang tete rehng go Haroset-Hagoyim. Bo wulu nsoja Sisera kpee, jol na wohng saam.

17 Yefono Sisera be akpade akpade song yel go mobkpatahk no Jayel nkal no Heber ji lohng go et'tohngo Ken, tibre ntul a Hasor no bo jo lung-e re Jabin jolo etem a ejahbe ji Heber nne a Ken

18 Jayel kehm lohngo go ege mmobkpatahk song wane Sisera kehm bungu tong-e re, "Ba nsoo, ba ka fahl. Á kehm song yel go ege ebkpatahk, Jayel kehm-e konngo egbvgbv.

19 Sisera kehm-e tongo re, "Alahb ma-m kor, kam alahb me n wo." Jayel kehm lennge ekpukpuk ji bo ko ngunyam lim ka-e alahbbel nfong re á wo, fere feere egbvgbv konng-e.

²⁰ Sisera kehm tongo Jayel re, "Yiimi mbutahk, nne awohng awohng l'ba bahb-a re, 'Nne noa aa?' Tong-e re nnene limm."

²¹ Eji Sisera ma gbo ellu tib go ellahnge ni á ma lahng, Jayel nkala Heber kehm rodo efamfam, a ngan, kehm nyaabe song kum Sisera go nwonngo etung bade ndi, á kpo.

²² Eji Barak ba rehng, kpi Sisera seb, Jayel kehm song wan-e, kehm-e tongo re, "Ba, m bahk-a tibi nne no a kp-e sebe." Á kehm-e toono yel go mmobkpatahk, song nyehn Sisera nong no, bo m-e kum ebfamfam go nwonngo etung, á ma kpo.

²³ Efung bio Esowo ga Jabin ji ntula Kenan, go esamahr bi anebe Isreel.

²⁴ Abone Isreel kpe bel atahne gbalee sehng Jabin ntula Kenan, tete bo wul-e.

5

Ese ji Debora yimi no

¹ Efung bio Debora, a Barak mmona Abinoam yimi ese jia;

² "Ngare nyi atubesi anebe Isreel l'gbo mbang, l'tob kor ane fvfo re bo rod elbo lim eltum, tehken Jehova!.

³ "Wuungen atung, wahn atul, wuungu wahn ji kpi ane fili. M bahke yimi tehk Jehova, m bahke yimi, m bahke kubu ase ka Jehova, ye ji li Esowo bi Isreel.

⁴ "O Jehova, ngare nyi á mehle go Seir jo sehng go nla ejahbe nyi Edom, ndi gb'gbehke, elbung na elahb, akparesemsem tob na alahb.

⁵ Awong gbehke go esamahr Jehova, Esowo bi Sinayi, ano wo jolo go esamahr bi Jehova, Esowo bi anebe Isreel

⁶ "Go afung nyao nya Samga mmona Anat, go afung nya Jayel, ane yaange abang, ane ba yaange abang jo sehng go abang ekulugbe.

⁷ Abonea ane abikabik sa go abon ajahbe ba Isreel, tete Debora kehm bake ana nnyehn nne go Isreel.

⁸ Eji abone Isreel yehke asowo nfenfe, ebta ba rehng go bo ati mbu. Jol go ellong atakuru ane ebo, ba jolo ane atahltahl nkpel atahl alon, ejum ebta ajehng ajehng jolem ana ekum, afi elkong

⁹ Eltim ename li go eji atubesi ba Isreel, a ane ba bele ekor rod elbo ka. Tehken Jehova!

¹⁰ "Wuungen atung, wahn ji jehk abarebare ebvankang go njahm, nya bo ma kunu agbvgbv nya kp'kpoodo, a wahn ji kp'jene go akpade.

¹¹ wuungen abayimase atung bo ji jehk go abingilahb, bo kp'fange anoobo nsol nya Jehova ma lim, a esehnge ebta, ji á ma ka atahntahna anebe Isreel. "Ane ba Jehova jene tete song rehng go ati mbu.

¹² 'Debora mehl mehl, mehl wo yim ase. Mehl yiimi Barak! Rod anebekv eba ba a ma bob song, mmona Abinoam.'

¹³ Ane bao ba sa no, feere ba kpiri atubesi ebo. Bo ji jolo ka Jehova ba kpir-m, a etoobo ebjing ji bo bahke noko ebta a atakuru nya njahm nyehko.

¹⁴ Ane bako lohng go et'tohngo ji Efrem, edi jio ji tohko jol ka anebe Amalek; et'tohngo ji Benjamin fvfo tob woomo go ellong ane ba jo toon-n. Bomo go et'tohngo ji Makir, atakuru

bomo eljene abake, bo johko lohng go et'tohngo ji Sebulon ji jolo atubesi ebta.

¹⁵ Atubesi ba Aisaka tob jolo a Debora, a Barak, jo toono bo asongo go edamme. Go nfam nyi Ruben nne ne bumem ntir nyi eljeke.

¹⁶ Jenji wahnge a sa go njahm go etahngga ebul, re wo wuk ana abaabebul kpi afiri wor kon ebul re bo ba kono edi ajehnga? Go ejahbe ji Ruben, a nnene bumem ntir nyi eljeke.

¹⁷ Anebe Gilied sa go egbuk aya Jodan jehko. Jenji wahnge anebe Dan sa go edi ji bo kpo bum asohkkahng? Anebe Aser sa go edi ebo, ji li go elga, edi ji bo kpo bum agbang ebo.

¹⁸ Anebe Sebulon yake elkpin ebo ka, ana anebe Naftali ka go emahng ebta.

¹⁹ "Atul lohngo ba nok. Atul bao ba ajahbe nya Kenan lohngo ba nok ebta go Taanak nkpe aya ma Megido, bo maam da asilva.

²⁰ Go elbung alonlo sa nok ebta, bo sa go adi bo nok a Sisera.

²¹ Aya ma Kison ma feenge bo tahm, ak'kulu aya mao. Bel ekakeltim, etohko ejame, wo jen song.

²² Akpade nya any'nya kehm jo jahre na jahre go ndi jo wahl , bo jo ware abahl, bo jolo atahntahn any'nya nya ebta.

²³ Enjel nyi Jehova kehm bungu re, 'Nkuk nyi nnen jol ka ejahbe ji bo kpo lung re Meros, a ane ebe, tibre bo baam ba kak Jehova ebo, eji atakuru ane baa a jo nok a bo.'

²⁴ "Nong elfuulu ga jol ka Jayel go ellong anebkal, ye ji li nkal no Hebar, nne no lohng et'tohngo ji Ken. Elfuulu ga jol ka-e, go ellong

anebkal ba lene go abonkpatahk.

²⁵ Eji Sisera bahb-e alahb re á wo, Jayel ka-e alahbbel nfong ma bo ki semme alahb. Á kak-e go mmohk nyi atul kpo wo.

²⁶ Jayel rodo efamfam, go eboblum, á rodo ngan. Á kehm kumu kak Sisera go esi, lahm bohngo njahm nyehko.

²⁷ Á gbo, sa noongo o ndi, á gbo go ege alata, edi ji á gbo no owo á noongo no kpo.

²⁸ "Nnyehn no Sisera jo seenge sehng go ewindu, eji á li go ege atahng eksp'kpa, á ji re á nyehn re mmon kp'feere kehng, á kehm kehme elbundu re, "N'nan mmvtv akuungu akuungu enye ma laange go elkehng? N'nan n kala tiki wuk agare mmvtv akuungu akuungu enye kp'bake?

²⁹ "Nfaange lohngo anyo nya akahnkahn anebkal ba jolo jo limi eltum a ne, á jo bungu ntahngtahng re:

³⁰ 'Bahke jolo re, bo kp'baange nsol nyi bo ma da . Nnenlum awohng awohng bahke ma bel ngbahme anyehng, afi ebal ebal. Bahke ma jol re bo kp'baange abomo nya bo ma tub go nkpiida nkpiidi ka Sisera, nyandiki bo bahke koko ba kam.

³¹ "Jehova, nong anebekv eba kpee kpo ana Sisera. Nong nne awohng awohng no wo kp-e koro jol ana njul nyi ma ta elbange lohng go eko eje."

Nnya atahl abal Isreel jolo ebo soom.

Gideon wo biingi ane alon ba lame Isreel

¹ Abone Isreel kehm kpe lim abiafem go esamahr bi Jehova. Go nnya esehma, Jehova yake bo, bo song jol aju go elwo ni anebe Midia.

² Tib go esi ji anebe Midia jo sab bo go elfili , abone Isreel be rehng go ero awong, song biiri go akpatal, agohng, a eko ebta.

³ Ngare anyehng anyehng nyi abone Isreel l'bahm nsol, anebe Midia, a anebe Amalek, a ane bako ba lohng ero nfam, bahke bake ba kehme elnoko a bo.

⁴ Bo sa o kak elsi, jo ranng nsol alehke ebo tete rehng go Gasa. Jol ejum ajehng ajehng ji ellehke, bo kpeem jo yake ka Isreel, ejoro, adamagbudu, a ebvankang, ebvankang kpee.

⁵ Bo jo ba a atohkondi atohkondi ebo, a nkpatahk, ana elkpa agohrobi. Jol a nehm ma fange bo, a akamel akamel ebo. Tete bo li nsol kpee mal, kehm feere.

⁶ Eji anebe Midia ma li nsol abone Isreel kpee mal, owo abone Isreel kehm lingi tong Jehova re, á kak bo ebo.

⁷ Eji abone Isreel lingi tong Jehova tib go esi ji anebe Midia,

⁸ á tumu bo nnyehnamahr no bungu re, "Ji ji a, ji Jehova, Esowo bi Isreel bungu no: n yehk-n go eju bi n jolo go Ijib.

⁹ N tahr-n yehke go elnohko ni anebe Ijib, a ane kpee ba jo nohk-n. N kame anebekv ebahne, fere ka-n ndi abo.

¹⁰ N bungu tong-n re, 'Me wo li Jehova, bi li Esowo ebahne; kana tiki kak asowo nya anebe Amor, bo ji n lene eboa ndi.' Jol rn m-e wukem."

11 Owo enjel nyi Jehova kehm ba ji go nnahb eti nyi bo kpo lung re oak ji li nfam nyi Ofra. Edi jio jolo ka Joas ji lohng ebangenahb ji Abieser. Gidion mmon a Joas jo ruumu nsam o edi ji bo kpo kaame amahm yehke go akab greb, eji anebe Midia l'k'nyehn.

12 Owo enjel nyi Jehova kehm ba kpir-e kehm-e tongo re, "Jehova li a na, wo egburu ntakuru."

13 Gidion kehm faange re, "Nsoo, l'jol re Jehova li anahre, jengi wahnge nsol nyia kpee kp-r limi? Akpokosi nyanehm nya na, nya babnsoo tong-r bade, eji bo bungu re, anv Jehova sang yehk-r go ndi nyi Ijiba? Á ma feere ba tahng-r tub, faak-r kak anebe Midia go ebo.

14 Owo Jehova kehm sennge fere go ege, kehm bungu re, "Song go nsahm nyi a kpi no, song tahre anebe Isreel yehke go ebo bi anebe Midia. Me wo kp-a tumu."

15 Gidion kehm faange re, "Anv, Jehova m bahke limi renan, kehm tahre anebe Isreel? Ebangenahb ejame ji li morenge ebangenahb go et'tohngo ji Manase, ga me n li erenng nne go egame ebangenahb."

16 Jehova kehm bungu tong-e re, "M bahke jolo a na. Á bahke noko a anebe Midia ranng bo, are a kp'noko a nne awohng."

17 Gidion kehm faange re, "L'jol go etingitingi re a bahk-m kake ebo, tib-m elliingi re wo wo kp'bungu aname.

18 Ka tahm tete me n song ko ejum elyare ejame ba kaa. Jehova kehm faange re, "M bahke jolo a tete, a je feere."

¹⁹ Owo Gidion kehm yange go ege etahk, song wul mmombul baange, fere rod abe nya bahke ruru eltahl a ngbugu ebal lim abred nya ayist ki wob go atahng. Á kake nnyam go ejeere, kak abehne go mmotu, kehm koko ba ka enjel nyi ji go nnaht eti nyi bo kpo lung re Oak.

²⁰ Enjel nyi Esowo kehm bungu tong-e re, "Rod nnyam nyio, a abred nyao nya ayist ki wob atahng kunu go ekpartal, yaange abehne nyao wohngo." Gidion kehm limi ano.

²¹ Enjel kehm rodo ehti bi á fili go ebo, koro nnyam, a abred nyao. Agun kehm seke go ekpartal jio fere fi nnyam nyio, a abred. Enjel nyi Jehova soro lamme.

²² Eji Gidion sebe kahn re enjel nyi Jehova nyi, á kehm rabe, "Nsoo Jehova! Me n nyehn enjel nyi Jehova gbul gbul gbuul!"

²³ Jehova kehm bungu re, "Elkoono jol a na, ka fahl, a nehm kpo."

²⁴ Gidion kehm limi egudu njom ka Jehova edi jio, fere jo lung re, Jehova wo li Elkoono. Jia yim tete tub lela go ejahbe ji Ofra, go edi ndi ji ebangenahb ji Abieser.

²⁵ Atv manehm o, Jehova kehm-e tongo re, "Yehke etoono mmona nfong no nlum no ga gbal, go ellong enyam nso, no ma kang nnya esehma. Far egudu njom Baal ji nso, tob kim ego ji Asera ji li kohlo o tub go ndi.

²⁶ Lim egudu njom ji nno a nno ka Jehova edi ewong jia. Ko nfong, wo lim njom nyi bo kpo jahm na fi. Ko ego ji Asera ji a kimi no tub, ana nkun.

27 Gidion kehm rodo alokeltum ebe na awubu, bo song lim jang jang ana Jehova tong-e no. Á Limem jia a, njul á limi atv, tibre elfahle jol-e jol bade ebangenahb eje, a ane ba jolo go nfam.

28 Efungfu eji ane ma nyahme, bo kehm sebe kahn re, egudu njom ji Baal bobwa, tob kim ego Asera tub go ndi, bo limi egudu njom ji nfenfe, fere ko etoono mmona nfong no nlum no ga gbal lim njom kunu o.

29 Ane kehm kehme elbahbe atemtem, "Nne awo limi ejum jia? Eji bo feede nobnob, bo kehm tongo bo re, Gidion mmon a Joas wo limi."

30 Anebelum ba ejahbe jio kehm tongo Joas re, yehke mmon ewe ba a ne, á bahke tiki kpo na, tibre yebwa egudu njom ji Baal, fere kim ego ji Asera ji jolo kohlo o tub go."

31 Owo Joas kehm faange agbanne bao ba lohngo no ba re, "Wahn ba kp'gboko siki ka Baala? Wahn ba bahke noko ka-ea? Nne no l'nok ka-e, bo bahke ye wul behna efungfu! L'jol re Baal esowo bi, nong á nok a nne no ranngge egudu njom eje antahng."

32 Bomo efung bio asongo, bo jo lungu Gidion re, Jerubaal, ji lohngo re, "Nong Baal nok ka elne antahng." Tibre á wa egudu njom ji Baal.

33 Gaam kpe kang nsoja nyi Midia, a nyi Amalek, a nyehko nyi lohng go ero nfam kpa njahm mehl ebta a abone Isreel. Bo siiri aya ma Jodan, ba kak elsi ebo, jolo go edamme ji Jesreel.

34 Owo Etohko ji Jehova kehm ba yel Gidion. Á kehm ba wor ntang a nnyam, yehke ane re bo tahm ebta, ane ba lohng go nnahb ji Abieser

lohng ba go ege

³⁵ Á tumu abatiingetib tv et'tohngo ji Manase, , Aser, Sebulon, a Naftali, re bo rod nsol ebta, bo kpee lohng song kpir-e.

³⁶ Gidion kehm bungu tong Esowo re, "L'jol re a bahke tahre abone Isreel sehng go egame ebo, ana a nyame no,

³⁷ tib-m go mbang nyia, m bahke bumu ngunyam go edi ji bo kpo ruumu nsam, ebohng l'na suku ngunyam nyi nyi, ndi jol wum wum, m bahke kahne re, a bahke tahre abone Isreel sehng go egame ebo ana a ma bung."

³⁸ Ano wo jolo no ful ful fuul. Gidion kehm nyahme etoono efung, song rod ngunyam nyio kaame, rur na go ekpingi erukabo.

³⁹ Gidion kehm bungu tong Jehova re, "Titi nong atahng ki-a rak tob-m. Nong me n kpe ko ngunyam nyia bahb-a ejum ajehng. Anv, lim ngunyam nyia jol wumwum, nong ebohng suku go ndi kpee."

⁴⁰ Atv mao Esowo limi ano, efungfu ngunyam jolo wum wum, ndi kpee suku tib ebohng.

7

Gidion gaa anebe Midia

¹ Gidion (ye ji tob li Jerubaal) a nsoja enye kehm mehle efungfu behre behre jen song rehng go elbing alahb ni bo jo lung re Harod. Nsoja nyi Midia ebbum elsi ebo go ejang ebobkal ebo, feere go edamme ji li kohlo ewong ji More

² Owo Jehova kehm bungu tong Gidion, "Atakuru anebe ebta ba li a na ebrur sehng.

N l'yake bo ane kpee re bo song nok a anebe Midia, anebe Isreel bahke woro nnyo re eko ebo ji ma ka bo esehngebta.

³ Tong abone Isreel re, 'Nne awohng awohng no kp'fahle, nobo re á yake ewong Gilied feere kehng.' " Nsoja atahltahl nkpel atahl abal a nkpel elku, kim kuuk feere kehng. Nsoja nyi sa no jolo atahltahl, eltahl a nkpel elon.

⁴ Jehova kehm kpe bung tong Gidion re, "Erik nsoja ebkpe tiki gbal sehng. Rod bo wo song go ebgba, go wo m bahke jeke, nne no n l'tong re ye wo bahke jeke á je a na, nne no n l'tong re á k'je á nehm je."

⁵ Gidion kehm koko ane bao tahm ebgba. Jehova kehm-e tongo re, "Ane ba jamme alahng, kohk nnyo jo wo alahb ana mbv nong bo yiimi ejang abehng."

⁶ Ane atahlku ba jo ko abo jo kpe alahb wo, egom jehko kpee jamme na alahng kohk nnyo jo wo alahb.

⁷ Jehova kehm tongo Gidion re, "Ane atahlku baa ba jo ko abo jo kpe alahb wo, bo ba m bahk koko, nok ga anebe Midia, fere tahr-a. Tum ane bako kpee bo kehng."

⁸ Ane atahlku ba sa goji Gidion, bako a taare bo nsol ebta, a atang, fere tum bo kehng. Elsi ni anebe Midia jolo edamme, Gidion a ane ebe bo kuumu ewong

⁹ Atv mao Jehova kehm tongo Gidion re, "Mehl wo song go elsi ni Midia, tibre n kp'sebe re me n rod bo kak-n go abo.

¹⁰ L'jol re a kp'fahle eljeke go ebo elsi, song a nlokeltum ewe no bo kpo lung-e re Pura,

11 wuungu atung wo wuk ji bo kp'bungu, eji a l'bel esahb ji a bahke song nok a bo." Ano wo Gidion abola Pura nlokeltum ewe badde tahm song rehng kohlo go ebo elsi.

12 Anebe Midia, a anebe Amalek, a ane bako kpee ba lohng go ero nfam, bo ebba rur go edamme, bo jolo ana ellong agorobi. Akamel ebo ruru ana erikehndi bi li go nkpe aya.

13 Eji Gidion rehng o, á wuku nne no kpi ntem nlem lak re, "N leeme nlem, n nyehne ebred ji jolo bannge bannge, ji bo ko abe nya lohng go bali lim, kp'bannge abake go elsi ni anebe Midia, bannge ba kahd ebkpatahk eko eko tete ebkpatahk bio tuulu gbo.

14 Owo nte we kehm-e faange re, "Nlem nyia, jol ejumjum sang, sehng ekahngkahng bi Gidion mmon no Joas nne a Isreel. Esowo ebfaake anebe Midia, a ane kpee ba kpo tob bo ebta nok, kak Gidion go ebo."

15 Eji Gidion wuku nlem nyio, fere wuk ana lohngo no á tehke Esowo. Á kehm feere ba ga elsi ni abone Isreel, kehm ba ku ane."Lohngen! Lohngeno! Tibre Jehova ebfaake elsi ni anebe Midia kak-n go abo

16 Gidion kehm yabe nsoja atahlku nyio edi ebra. Á rodo atang nya elworo, a abon atu ba enyaale wob atahng kak nne awohng awohng go ebo.

17 Á kehm tongo bo re, "Seeng-m wahn." N l'rehng kohlo n kon kon elsi, "Ajehng ajehng ji n l'nyehn-m n kp'limi, tob limen ano.

18 N l'wuk-m, a ane ba li aname ma wor atang,

tob woren, wahn kpee ji li sennge elsi nia, wahn rabe re, "Li ka Jehova, a Gidion." "

¹⁹ Eji Gidion a nsoja atahl alon nyi jolo a ne ma rehng go nkpe elsi nio ni anebe Midia, jolo nlum atv, eji bo ma yaange abab'baabe. Bo kehm kehme atang wor, fere wa abon atu ba wob bo go abo.

²⁰ Owo bo kpee kehm kehme atang wor, fere wa atu ebo. No nne kehm rodo enyaale go ebobkal, ntang eboblum jo rabe re, "Ekahngkahng bi Jehova, a bi Gidion."

²¹ Nne awohng awohng yiimi edi ji bo bum-e no sennge elsi nio kak, anebe Midia kehm kehme elbeke ayambu ayambu aling aling go nnyo.

²² Eji nsoja atahlku nyio woro atang ebo, Jehova limi nsoja nyi anebe Midia kpee go bo elsi, bo fere jo nok atemtem go akahngkahng. Egom ji bo ki wul bo, yaame be rehng go Bet Sita mbang mbang nyio nyi Serera rehng go nseenge ejahbe nyi Abel Mehola ji li kohko Tabat.

²³ Gidion tumu etib tv nsoja nyi Isreel nyi li go Naftali, a nyi Aser, a nyi Manase, bo lohng kpee ba kam anebe Midia.

²⁴ Gidion tob tumu abatiingetib tv, ejahbe awong ji Efrem, tong bo re, "Badden, wahn ba bam anebe Midia go mbang alahb Jodan, tete rehng go Beth Bara."

Ano wo nsoja kpee nyi Efrem lohngo no, ba taare ndi nkpe nkpe nyi aya ma Jodan, tete rehng go Beth Bara.

²⁵ Bo bobo agburu anebe nsoja na abal ba anebe Midia, noko bo jo lung-e re, Oreb, noko Seeb. Oreb bo wul-e go ekpartal ji Oreb, Seeb bo

wul-e go edi amahm akaame ji Seeb. Bo kame anebe Midia ekidi l'lab, eji bo jo feere, bo ko esi Oreb, a ji Seeb ba ka Gidion . Ngare nyio á kpeka li go egbuk aya jehko.

8

Gidion wulu Seba abola Salmuna

¹ Anebe Efrem kehm bahbe Gidion re, "N'nan a ma-r lim ana? A ki-r lung , eji a jo tahm elnoko a anebe Midia? Ano wo bo taange t'tahne a Gidion

² Gidion kehm faange bo re, "Anv, elkohn ejum aji m ma l'lim sehnge j'jahne? N'nehme kahn re, abiini akabe greb nya sa go egbe ji Efrem nya kp'gaka nob sehnge egbe kpee ji bo kpa no go ebangenahb ji Abiesar?

³ Esowo ka-n Oreb abola Seeb, atubesi anebe Midia. Jenji m ma lim, e l'dumu, a jio ji jahne?" Eji Gidion buntu alum nyao , ntim ebo kehm naange bo.

⁴ Gidion, a nsoja atahlku enye, ba siiri Jodan, a ellahnge ellahnge ebo, bo kpe soro asi jo kam anebekv.

⁵ Eji bo rehngwe go Sokot, Gidion kehm tongo anebekul Sukot re, "Ka-n nsoja enyame nsol alehke, bob gbo ewo. N kpi nkame nkame atul bao ba anebe Midia, Seba abola Salmuna.

⁶ Atubesi ba Sukot kehm-e faange re, "Wo a ka bob Seba abola Salmuna, n'nan wahnge e bahke kake nsoja enya nsol alehke?"

⁷ Gidion kehm faange bo re, "Ebnob, Jehova l'yake Seba abola Salmuna kak-m go ebo, m bahke koko ajoongo asohkonso, a akpiri, ba jaake agubjing enyahne.

⁸ Gidion sehng e o song rehng go ejahbe ji bo kpo lung re Peniel, tob song bahb bo nsol alehke, bo faange Gidion ana anebe Sukot faang-e no.

⁹ Á kehm bungu tong anebe Peniel re, "Nl' feere a esehng ebta ejame, m bahke wake nkahmbungubungu etahk ejahne ji n kpo kuumu baabe ejahbe."

¹⁰ Ngare nyia, Seba abola Salmuna, a nsoja ebo, nyi li, ane atahltahl nkpel eltahl, a nkpel elkubal a ane atahl awubu, li go Karkor, bo ma sa go ellong nsoja nyi lohng go ero nfam. Tibre nsoja atahltahl nkpel atahlku, bob wul bo.

¹¹ Gidion kehm sehng e mbang mbang jo tahm ero nfam, ajahbe nya bo jo lung re Nobah, a Jogbehah, bo song kpiri nsoja nyi anebe Midia nyi ki kunu ekpu, fere nok a bo.

¹² Atul abal ba anebe Midia, Seba abola Salmuna be, Gidion kam bo song bob, nsoja ebo be yaame.

¹³ Eji Gidion mmona Joas ma bob bo, á kehm feere kehng e go emahng ebta, á sehng e montoora mbang no li go ewong, no bo lung re Heres.

¹⁴ Gidion bobo monjangkun no lohng go Sukot, á bahb-e abahbe, njankun nyio kehm yeele abing ane atahl ara, ane elku ane abal ba jolo atubesi, a anebekul Sukot, ka Gidion .

¹⁵ Gidion kehm feere ba rehng go Sukot, kehm ba bung tong anebe Sukot re, "Nyehnen Seba abola Salmuna gana. Wuku n jo nyok-m re, 'Wo Seba abola Salmuna a ka bob bo, n'nan a kp'sebe re wahr ka nsoja enya nyi ma lahng nsol alehke?' "

¹⁶ Á koo asohkonso, a akpiri dv anebekul bao

n'nob, jolo ana elle ka bo.

¹⁷ Nkahmbungubungu etahk Peniel, á wa tub, fere wul anebelum ba li ejahbe jio.

¹⁸ Gidion kehm bahbe Seba abola Salmuna re, "Ane ba ń wulu go Tabor, bo jolo elkohn ane abaa?"

Bo kehm-e faange re, "Bo jolo ana wo, bo foongo abone ntul."

¹⁹ Gidion kehm faange bo re, "Abonanee ba o, e lohng nnyehn awohng a bo. Etingitingi, ana Jehova li go elkpín, li re ń wulem bo, kehn wahn nehm wul."

²⁰ Á kehm senngé seenge mmon ewe no nkul no bo kpo lung-e re Jeta, kehm-e tongo re, "Wul bo." Jol Jeta wobem ekahngkahng ebe, tibre á jo f'fahl eji á jolo njankun.

²¹ Seba abola Salmuna tongo Gidion re, "Á l'jol nnenlum wul-r antahng.' Ano wo Gidion soro wul bo, ane abal abal. Á yehke nsol nyi bo kpo ko liibi akamel ebo go amel.

Gidion limi ebulungang ji nlimanjom

²² Abone Isreel kehm tongo Gidion re, "Wo jo fil-r, mmon ewa, a mmon a mmon ewa, tibre wo wo ma-r tahre yehke go abo nya anebe Midia."

²³ Owo Gidion kehm faange bo re, "Me nehm jol nne no bahk-n fili, jol mmon ewame nehm jol. Jehova wo bahk-n fili!

²⁴ N kpi ejum ajehng ji n kp-n bahbe, "Nong, nne awohng awohng ewahne ka-m ebangetung, nsol nyi ń da no goji anebekv ba ń ma sehngé bo." (Eljini ni anebe Ismael ni re bi jo kak abangetung nya agul).

²⁵ Bo kehm faange re, "E bahke kake go eye-batahng." Owo bo kehm yale mbomo, no nne kehm koko ebangetung ba kak. Bo yehke go ellong nsol nyi bo ma da.

²⁶ Ellubu ni abangetung nyao lubu no jolo ejum ekilo eltahl. Bo tob ka-e alahm lahm nsol nyako nya kpo kim ekun. Nsol ana nyia nyi bo kpo liibi, nya bo kpo kak emel, a nsol elkake nyi ntul no Midia kpo liibi, fvfo asinimel nya bo kpo kak akamel go emel.

²⁷ Gidion rodo nsol nyio kpee lim ebulungang ji nlimanjom jo kak. Á song bumu ejum jia go ege ejahbe, ji bo kpo lung re Ofra. Jol gaam kang anebe Isreel kpee yake Jehova fere jo song gbo jamme alahng jo kak ebulungang jio. Fere jolo na ekpoko ka Gidion, a ebangenahb eje.

Elkv ni Gidion

²⁸ Ana wo Isreel kadde anebe Midia tv go ndi, bo kpeem tiki mehl esi emehle mehle. Go nnya atahl abal nyi Gidion kpe jol go elkpin, Isreel jolo go elkoono.

²⁹ Owo Gidion (ji li Jerubaal) kehm feere kehng go ege ejahbe.

³⁰ Á bele abon atahl ara, abon awubu, ba nlum, tibre á bele akal gbalee.

³¹ Nnenkal awohng jolo go Sekem no á jo bum elkang a ne, nnenkal noo jele mmon no nlum ka-e, no bo jo lung-e re Abimelek.

³² Gidion mmon no Joas kpoo eji á ma sahb k'kul. Bo song kake go eyele nde, go ejahbe ji bo kpo lung re Ofra, go ebangenahb ji Abieser.

³³ Anebe Isreel yake Esowo, feere song kehme

Baal loko ngare nyi Gidion ma kpo. Bo ko Baal Berit jol esowo ebo, fere lim alokelom enye nya bo jo kak..

³⁴ Bo yini Jehova, ye ji li Esowo ebo, ye ji ma tahre bo yehke go ellong anebekv ba sennge bo kak.

³⁵ Jol bo tibem ebangenahb ji Jerubaal (ye ji li Gidion) nnoobo anyehng anyehng go anoobo nsol nya á limi ka Isreel.

9

Abimelek jolo ntul go Sekem

¹ Efung abehng Abimelek mmon no Gidion kehm tahme go Sekem , edi ji abonanyehn nnyehn li no, kehm song tong ejahbe nnyehn re,

² "Bahben anebe Sekem, l'jol re bo kp'sebe re abone Gidion ba li ane atahl ara, ane awubu, ba bahke fili bo, afi nne awohng wo bahke fili bo? Buumen re, me, a wahn abonanyehn ba."

³ Eji abonanyehn nnyehn bungu ejum jia tong anebe Sekem, bo bumu ntir re bo bahke toono Abimelek, tibre bo bungu re, "Ye mmonannee ejahre wo."

⁴ Bo yehke akpohko go etahk elom Baal Berik, jolo akpohko esilva atahl ara, esilva ebwubu, ka Abimelek, á yaame nsoja jo toon-e.

⁵ Á mehle tahm go etahk nde ji li go Ofra, song ko afun ebe, ba jolo ane atahl ara, ane awubu ba wul bo kpee go eltal. No ga se, no bo kpo lung-e re Jotam wo be for song biiri.

⁶ Owo nfam ejahbe nyi Sekem, a Bet Milo kehm ba kono asi go egburu nnahb eti nyi li kohlo ego ji li go Sekem, re bo bob Abimelek etul.

⁷ Eji Jotam wuku bade, á kehm wahre go ewong Gerisim, kehm rabe tong anebe Sekem re, "Wuungen atung wahn anebe Sekem eji Esowo bahk-n tob wuungu atung."

⁸ Efung abehng nti kehm tahme re bo song bob ntula bo, bo gbo mbang tong eti ji bo kpo lung re Oliv re, "Jol ntul ewahre."

⁹ Á kehm tene, kehm bungu re, "Anv me n yake akehng ma n kpo lim, ma kpo ka asowo, a ane elfuula, fere jo yanng ana ntul no ntia?"

¹⁰ Nti kehm kpe bung tong efig, 'Ba wo ba jol ntul ewahre.'

¹¹ Efig kehm faange bo re, 'Anv, me n k'kpe kab anobonobo akab enyame fere jo yanng ana ntul no ntia?

¹² Nti kehm ba tong el'lehke greb, 'Ba jol ntul ewahre.'

¹³ Owo el'lehke greb kehm faange re, 'Anv, me n k'kpe lim amahm, ma kpo lim asowo, a ane bel eyebatahng, song yanng ana ntul no ntia?'

¹⁴ Es'kohro nti kehm bungu tong eti ajoongo ji ma sahb t'tahb re, 'Ba jol ntul ewahre.'

¹⁵ Á kehm faange bo re, 'Ní l seb re me n jol ntul ewahne, ba woomen go egama en'nang. Tohko jol ano, nong agun go egame song fi nti nyi li go Labenon kpee.'

¹⁶ "Anv, wahn eblim nobnob, a ekpunu re wahn bob Abimelek, á jol ntul ewahna? Ní l'lim nob nob ka Gidion, a ebangenahb ejea? Ní tib-e tib nnoobo

eljini ana fuumu noa?.

¹⁷ Kana yini re, nsoo noko ka-n gbalee, eji á fili elkpin ene go ebo, tahr-n yehke go abo anebe Midia, fere ga bo.

¹⁸ Wo lela, n kp'fere nok a etahk nsoo. Abone ebe ba li ane atahl ara ane awubu, n wulu bo go eltal anehng fere rod Abimelek ji li mmon a nju, bob-e etul ka anebe Sekem, tibre mmonanne ejahne wo.

¹⁹ L'jol re ji n ma lim a, n limi nobnob, a ekpunu ka Gidion a ebangenahb eje, nong Abimelek lim-n wahn bel eyebatahng, wahn tob lim-e á bel eyebatahng.

²⁰ Fvfo, l'jol re, n limem go nseenge, nong agun lohng goji Abimelek ba fi-n, wahn anebe Sekem, a anebe Bet Milo, nong agun tob lohng go egahne wahn anebe Sekem, a anebe Bet Milo ba fi Abimelek!"

²¹ Jotam kehm beke song lene go Beer, tibre á jo fahle Abimelek mmonannyehn.

²² Eji Abimelek ma fili Isreel go nnya era,

²³ Esowo kehm yake ebi etohko, ji ba yel go ellong ni atubesi anebe Sekem, a Abimelek, bo we joom kpe wuk.

²⁴ Esowo limi jia, eji a l'bongo Abimelek eji á wulu abonanyehn, ane atahl ara ane awubu ba jolo abone Gidion, fere tob bongo anebe Sekem ba tob-e no wul abonanyehn.

²⁵ Anebe Sekem ba ki woomo njahma ntul tumu ane re bo song biiri go ero awong. Nne awohng awohng no l'sehng o bo taare nsol. Nne j'je song tooro tong Abimelek.

²⁶ Ngare ny'nehm o, Gaal mmon no Ebed mehle

a abonanyehn song rehng go Sekem, ana bo je no, yebe anebe Sekem sehng, ye wo bo yehke amahr ebo kun-e.

²⁷ Eji bo ma je go ebo ebgbe, song bong akab greb ba kaame, bo kehm limi elkak go etahk asowo bo. Eji bo jo li fere w'wo, bo kehm kehme Abimelek su.

²⁸ Gaal ji mmona Ebed kehm kehme elbundu re, "Nne awoo li li Abimelek? Ejum ajii wahr anebe Sekem kpi no a Abimelek, ji wahr bahk-e loko?. Ye sang li mmon no Gidiona, Sebul sang li ekpeeleejea? Nong wahr loken et'tohngo ji Hamor ye ji li nde no Sekem . Jenji wahnge wahr bahke jolo alokeltum ba Abimelek?

²⁹ Li re me wo kp'fili ane baa, kehn m bahk-e yehke. M bahke tongo Abimelek re, 'Yehke nsoja enya kpee ba!' "

³⁰ Eji Sebul ji jolo ntubesi ejahbe wuku alum nya Gaal mmona Ebed bungu no, atahng rake sehng.

³¹ Á kehm tumu atiingi etib mbehr mbehr tv Abimelek go Aruma re, "Gaal mmona Ebed, a abonanyehn ebba ga Sekem, bob ba melle ane re bo k'kpe koono a na.

³² N kp'sebe re ngare atv wo, a ane eba, wahn ba biiri go mbang jo sik bo.

³³ Efungfu, ngare nyi njul ma ta elbange, jo jeeren asongo go ejahbe. Gaal a ane ba li a ne, l'mehl a nahne, limen bo ajehng ajehng ji n l'mal."

³⁴ Ngare nyi atv ma behde, Abimelek a ane ebe kehm yabe elbo nlong eni, biiri kohlo Sekem.

³⁵ Ngare nyi Abimelek a ane ebe ma lohng go

edi ji bo biiri no Gaal yiimi go eti mbu.

³⁶ Eji Gaal nyehne bo, á kehm tongo Sebul re, "Nyehn ane go kp'badde ewong abakae!" Sebul kehm-e faange re, "N kp'nyehne atohko awong ana ane."

³⁷ Gaal kehm kpe bung re, "Nyehn ane go kp'lohngo abake go elka emahng, ellong nehko kp'lohngo abake go nnahb eti nyi ane ba kpo bu mbu kpo ji.

³⁸ Sebul kehm bahbe a esahb esahb re, "Nnyo mi a jo wor mehna? Wo sang bungu re, 'Nne awo li li Abimelek ji wahr bahk-e loka?' Ane baa sang a jo nyok boa? Song nok a bo!"

³⁹ Gaal kehm mehle a anebe Sekem, kehm kehme elnoko a Abimelek.

⁴⁰ Abimelek kehm-e kehme elkame, anebe Sekem gbalee, jo gbo nsol jo lim bo, mbang mbang asongo go eti mbu.

⁴¹ Abimelek sa go Aruma, Sebul wo wo kame Gaal, a abonanyehn yehke go Sekem

⁴² Etoono efung behko anebe Sekem kpe mehl ebta, eji Abimelek wuku ano,

⁴³ á kehm yabe ane ebe go nlong era, bo kehm song biiri. Eji Abimelek ma nyehn ane kp'lohngo go ejahbe abake, bo kehm lohngo edi ji bo biiri no jo nok a bo.

⁴⁴ Abimelek a ellong ane ebe song sahd eti mbu re anebe Sekem k'bel mbang yel, nlong ebal nyehko jo wulu ane bako go emahng.

⁴⁵ Efung bio kpee Abimelek noko a bo, tete á wul ane kpee, ko ejahbe. Á ranng ejahbe jio kpee, fere sale akang wohngo o.

⁴⁶ Eji ane ba li go Sekem ba kun go nkahmbun-

gubungu etahk ebta wuku ji ma jol, bo be song biiri go eko ebta jio ji etahk El Berith*.

⁴⁷ Eji bo song tong Abimelek ana ane bao ma song kono edi ajehng.

⁴⁸ Ye a nsoja enye wahre go ewong Salmon. Á rodo elfuk kiimi ab'bo nti, fere rod kunu ebahk, kehm tongo nsoja enye re, "Limen elwaare ana m ma lim a!"

⁴⁹ Ano wo ane ebe kpee kiimi ab'bo nti jo toon-e. Bo song sahde mbu mi eko ebta, kak agun tv bo go atahng. Ane kpee ba woomo etahk jio, bo rehng ejum ane atahltahl nkpel ebal atahl awubu, anebelum, a anebkal anebkal.

⁵⁰ Abimelek kehm kpe tahm go Tebes song nok ga bo fere ko ejahbe.

⁵¹ Go atahng ejahbe, nka hmbungubungu etahk ebta jolo o, ji anebelum, a anebkal, a ane kpee biiri no. Bo bame elbo tv atahng, fere song wahr go nkpake nyi jolo go ero.

⁵² Eji Abimelek mehle re á song nok a bo o. Ana á jo niiri asongo, eji á ma rehng kohlo eti mbu ji etahk ebta re a song kak agun edi jio,

⁵³ nnenkal no kuumu go ero kehm yake mmon eltal ngoko tub Abimelek esi, esi bahnge.

⁵⁴ Abimelek kehm tongo nne no jo sol nsol ebta enye re, "Wob ekahngkahng eba wo wul-m, bo k'bung re, 'Nnenkal wo wulu Abimelek.' " Nlokeltum ewe kehm wobo ekahngkahng wul-e.

⁵⁵ Eji anebe Isreel nyehne re Abimelek ebkpo, bo kpee feere kehng.

⁵⁶ Ana wo Esowo ko bongo Abimelek go ebi ji

* **9:46 9:46** El Berith abola Baal Berith ejum ajehng ji

á limi go nlaaga nyi nde, eji á wulu ane atahl ara ane awubu, ba jolo afun ebe.

⁵⁷ Esowo tob bongo anebe Sekem go ab'bi ebo. Elsu ni Jotam mmon a Gidion lohko jol go etingitingi.

10

Tola wo biingi ane arakera ba lame Isreel

¹ Eji Abimelek kpo no, nne no lohng go e'tohngo ji Isaka, no bo jo lung-e re Tola, mmon no Pua, ji jolo mmon no Dodo. Ye wo lohngo ba Isreel tahre. Ejahbe eje jolo go ejahbe awong ji Efrem, ji bo kpo lung re Samir.

² Á kpoo eji á ma fili Isreel go eltahl a nnya era, bo kpa-e kak go Samir.

Jair wo biingi ane asehma ba lame Isreel

³ Eji Tola ma kpo, Jair ji lohng go Gilied tob ba fili Isreel eltahl a nnya ebal.

⁴ Á bele eltahl abon awubu ba nlum, bo bele eltahl edonki ebwubu bi bo jo fing. Bo jo fili ejahbe ebwubu go Gilied, nya bo kp'lungu tete sik lela re abon ajahbe ba Havot Jair.

⁵ Eji Jair kpoo no, bo kpa-e kak go Kamon.

Elnohko ni anebe Amon jo nohk anebe Isreel

⁶ Abone Isreel kehm kpe lim abiafem go esamahr bi Jehova. Bo jo toono Baal, a Astarot, asowo nya anebe Aram, a anebe Sidon, a anebe Moab, a anebe Amon, a nyao nya anebe Filisia. Tib eji abone Isreel tene Jehova, bo we kpeem jo loko,

⁷ Jehova bele erakatahng a bo. Á faake bo kak go abo nya anebe Filisia, a anebe Amon.

⁸ Elya nio, bo bomo anebe Isreel go elnohko, ano wo bo nohko bo go elku nnya era, bo ji jolo go ero nfam bio bi aya ma Jodan, go Gilied ndi nyi anebe Amor

⁹ Anebe Amon tob siiri egbuk aya ma Jodan song nok a anebe Juda, a anebe Benjamin, a anebe Efrem. Anebe Isreel jolo egburu erem.

¹⁰ Owo anebe Isreel kehm lingi go esamahr Jehova re, "Wahr eblim abiafem bada a na, tibre e ma-a yake, fere kp'toono jo loko Baal."

¹¹ Jehova kehm faange re, "Eji anebe Ijib, a anebe Amor, a anebe Amon, a anebe Filisia,

¹² a anebe Sidon, a anebe Maon jo nohk-n, n lingi no tong-m, wahn n tahr-m yehke go ebo aboa?

¹³ N ma-m ten, fere kp'toono asowo, wahn nehm kpe tahre.

¹⁴ Songen wahn song ling tong asowo nya m ma yehke. Nong bo tahr-n yehke go egahna ntong!"

¹⁵ Anebe Isreel kehm kehme elgboongo Jehova re, "Wahr eblim abiafem, kak-r erem abehng abehng bi a kp-r kake, lub tahr-r anv yehke go ebo abo."

¹⁶ Anebe Isreel kehm roko asowo ebo kpee go fere jo loko Jehova, kehm-e kehme eltim gbiingi go erem bi anebe Isreel kp'nyehne.

¹⁷ Eji anebe Amon mehle ebta, ba gba ji go Gilied. Anebe Isreel tob lohngo ba gba ji go Mispá.

¹⁸ Atubesi ba Gilied kehm bungu tong atemtem re, "Nne no l'gbo mbang mehl song nok ebta a anebe Amon, ye wo bahke jolo ntubesi ka ane

kpee ba lene go Gilied."

11

Jefta, wo biingi ane anehkeni ba Lame Isreel.

¹ Ngare nyio egburu etahntahn nne jolo go Gilied no bo jo lung-e re Jefta. Nde bo jo lung-e re Gilied; Nnyehn jolo nne as'sa.

² Nkal no Gilied tob jele abon ba nlum ka-e, ngare nyi bo ma gbal, bo kehm kame Jefta nfun abo yehke go ebo ellong. Bo kehm bungu tong-e re, "A nehm tiki sa a, ba li elkv nsoo a nahre, tibre nne no jel-a no nne as'sa wo."

³ Owo Jefta kehm soro be goji afun ebe tahm go ndi nyi Tob, go wo á song bel ellong atahnsi ane ba ki bel ejum ajehng ajehng ji ellimi.

⁴ Eji ma kang abon afung ntiil, anebe Amon kehm ba kehme elnoko a anebe Isreel.

⁵ Anebekul nfam ba Gilied kehm tahme go ndi nyi Tob re bo song ko Jefta.

⁶ Bo kehm song tong-e re, "Ba wo ba jol nt'tohko ewahre wahr song nok a anebe Amon."

⁷ Jefta kehm faange bo re, "Me wahn korem, owo wahnge n kam-m go nlaaga nyi nsoo. N'nan n bahke bake go egame anv, eji n wob go ntong?"

⁸ Bo kehm-e faange re, "Jio ki-a gbiingi anv, wahr ebfeere ba re wo ba tob-r nok a anebe Amon. A bahke jolo ntubesi no anebe Gilied kpee."

⁹ Jefta faange bo re, "L'jol re wahn ebfeere aname re me song nok a anebe Amon, Jehova faake abo kak-m go ebo, m bahke lohko jol ntubesi ewahna?"

¹⁰ Bo kehm-e faange re, "Wahr ebnyam re e bahke limi ana a bungu no, Jehova li ntianse enyahre."

¹¹ Owo Jefta tahme toono anebekul nfam a Gilied, bo lim-e a jol ntubesi no jo gbo bo mbang go ebta. Go Mispa Jefta kpe bung nsol nyia kpee go esamahr bi Jehova nyi á bungu tong anebekul ejahbe.

¹² Jefta kehm tumu abatiingetib tv ntul no Amon re á seb kahn ji wahng ka á ma bom abohng a anebe Isreel.

¹³ Ntul no Amon kehm faange abatiingetib bao re, "Ngare nyi Isreel lohngo go Ijib, bo taare ndi enyahre, bomo go aya ma Amon tete song rehng go aya ma Jobok, mbang mbang asongo go Jordan. Anv, feeren anyi ka-r enangebeem."

¹⁴ Jefta kehm tumu eltib tv ntul no Amon,

¹⁵ "Ji ji a ji Jefta kp'bungu: Ndi nyi Moab, afii nyi anebe Amon, Isreel taarem.

¹⁶ Ngare nyi bo lohngo go Ijib, bo sehng elka emahng asongo go Abili Aya tete song rehng go Kadesh.

¹⁷ Bo tumu eltib tv ntul no Edom re á lub fa bo nnyo bo sehng go ege ejahbe, á taamem. Ano wo bo tob bahng ntul no Moab, á tob ten. Isreel ba sa go Kadesh.

¹⁸ "Isreel sehng nkpe nkpe nyio nyi elka emahng nio ni Edom abola Moab, bo sehng ero nfam, ero nfam nyio nyi Moab, song rehng go nkpe aya ma Anon. Bo tikem siiri aya ma Anon rehng Moab tib o wo nkona ndi jolo no.

¹⁹ "Isreel kehm tumu eltib tv Sihon ntul no anebe Amor, ye ji kuumu go Hesbon re, 'Á fa bo

nnyo bo sehng go ege ejahbe song rehng edi ji bo fi no.'

²⁰ Sihon, taamem tv bo re bo sehng go ege ejahbe. Á toobo nsoja enye bum go Jahas nyi jo nok a Isreel.

²¹ "Jehova, ye ji li Esowo bi Isreel, yake Sihon, a ane ebe kak Isreel abo. Ndi nyio nyi anebe Amor lene no kpee.

²² Anebe Isreel ko edi ndi, bomomo go aya ma Anon song rehng go aya ma Jabok, sehng o rehng go elka emahng tete rehng go Jordan.

²³ "Eji Jehova, Esowo bi Isreel ma kam anebe Amor, taare ndi abo ka Isreel. Jenji wahng ka á kp'sebe re wahr rod ka-a?

²⁴ Anv á nehm ko ji Kemosh, esowo eba ka-a noa? Ano wo fvfo ji Jehova, Esowo ebahre ka-r no, ji ji e bahke koko.

²⁵ Anv, wo wo ga nob sehng Balak mmon no Sippo ji ntul no Moaba? Á t'taange a Isreela, afi nok a bo?

²⁶ Nyehn ejum nnya atahlku ma sehng, nyi Isreel ma lene go ndi nyia, bomomo go Hesbon rehng go Aroer, a ajahbe kpee nya li go nkpe aya nyi Anon. Nnya nnya nyia kpee n'nan a kala ko ndi nyia wuku wuku.

²⁷ Me, n wa ka soodo, á kp-m limi ebi anv ebta bi a ma-r bohko. Nong Jehova, ye ji li nl'lame no nno, toobo ntong nyia ka-r lela."

²⁸ Etib bi Jefta tumu tv ntul no Amon, jol we lubem.

²⁹ Owo, Etohko ji Jehova kehm ba yel Jefta, á kehm yele go atahng ejahbe nya Gilied, Manase,

a Mispa ji li go Gilied, song ku nsoja nyi bahke noko a anebe Amon.

³⁰ Jefta kehm koko nwongo go esamahr Jehova re, "A l'ka-m esehngebta go esamahr anebe Amon,

³¹ ejum ajehng ajehng ji gbo mbang lohng go egame etahk ba wan-m, eji m ma nok ebta ga anebe Amon, bahke jolo ji Jehova, m bahk-e rodo lim njom nyio nyi bo kpo jahm fi."

³² Jefta kehm tahme song nok a anebe Amon, Jehova rodo bo kak-e go ebo.

³³ Á ranng ejahbe na eltahl, bomo go Aroer tete rehng go Minit, sehng rehng go Abel Keramim. Ana wo Isreel ga anebe Amon.

³⁴ Re Jefta feere rehng etahk, mmon mmon awohng ewe no nkal wo lohngo ba wan-e, fere jo bahn ase nya bo jo kub. Ki li ye mmon awohng awohng noko á belem.

³⁵ Eji Jefta nyehn-e no, á kehm jabbe nsol ebjing ny'nye yare, fere biingi tiim, "Mmon ewame, eltim ename ebranng kpee eji á lohngo ba wan-m. Me n nyam enyam tong Jehova bi n l'k'ma kane."

³⁶ Mmon kehm faange re, "Nsoo wobnyam tong Jehova, rod-m lim ana a nyame no. Eji ntul Esowo ma-a ka esehngebta go esamahr anebe Amon, ba li anebekv eba.

³⁷ Tohko lim ejum ajehng jia ka-m ji n kp'sebe, "Me n song yanng a ate ebame go ero awong, ling a bo ejum nnyahng ebal, tibre n nehm tiki kpe bal nlum."

³⁸ Á kehm-e fake nnyo re á song, "Song yanng a ate ebe go nnyahng ebal." Ate ebe kehm-e toono

rehng go ero ewong, song ling a ne, tibre á nehm tiki bal nlum.

³⁹ Eji nnyahng ebal mio ma mal, á kehm feere ba goji nde, á rod-e lim ana á nyame no. Á sa mmongungu. Ana wo eljini ni Isreel fere jol,

⁴⁰ go elya anehng anehng abongungu anebkal jo lohngo go nfung eni song buumu bada mmon a Jefta ji lohng go Gilied.

12

Anebe Efrem noko a Jefta

¹ Anebe Efrem kehm song melle nsoja ebo, siiri song rehng go Safon. Bo kehm tumu etib bia tv Jefta re, "Jenji wahnge a kehm-r sehng sa song nok a anebe Amon, a ki-r lung re wahr ba tob-a nok a bo? E bahke jahme etahk eja, a na na fi."

² Jefta kehm faange re, "Me a ane ebame jo noko egburu enok a anebe Amon, n lung-n lung, m m-e tahrem yehke go ebo abo.

³ Eji n sebe kahn re m m-e nehm tob, n rodo elkpin ename go egame abo, siiri song nok a anebe Amon. Jehova ka-m ka esehng ebta, n ga bo. Jenji wahnge n yahke ba nok aname lela?"

⁴ Owo Jefta kehm lungu anebe Gilied bo ba kono edi ajehng, kehm song nok a anebe Efrem. Anebe Gilied kehm wulu na wul anebe Efrem, tibre anebe Efrem ebbung re, "Wahn anebe Gilied, n li na ane ba Efrem abola Manase ma ten."

⁵ Anebe Gilied ba taare elga ni bo jo siiri rehng go Efrem, edi ji kil ga rahbe, go aya ma Jodan. Nne Efrem no kp'beke l'ba elsiiri, anebe Gilied bahk-e

sahde go mbang, fere bahb-e re," Wo nne a Efrem woa?" Á l'faange re "E'ee,"

⁶ bo bahk-e tongo re, "Ebnob," lung re, "Si-boled." " Á l'fere lung re Siyiboled, tib eji á ki ma lung nobnob, bo bahk-e bobo song wul go elga Jodan. Anebe Efrem ba kpo ngare nyio jolo ane atahltahl nkpel atahl alon, a nkpel elon.

⁷ Jefta ji lohng go Gilied fili Isreel nnya erakera, kehm kpoko, bo kpa-e kak go Gilied.

Ibsan wo biingi ane asehmwubu ba fili Isreel

⁸ Eji Jefta ma kpo owo Ibsan ji lohng go Betlehem bomo Isreel go elfili.

⁹ Abone ebe ba nlum jolo eltahl abon awubu, ba nkal jolo eltahl abon awubu fvfo. Á rodo abon ebe ba nkal tang abangenahb nyandiki. Á tob ko agbahme go abangenahb nyako ba ka abone ebe ba nlum. Ibsan fili Isreel go nnya esehma.

¹⁰ Elkohro, Ibsan kehm kpoko, bo kp-e kak go Betlehem.

¹¹ Eji Ibsan kpo no, Elon ji lohng go Sebulon bomo Isreel go elfili. Á fili Isreel go nnya ewubu.

¹² Elon kehm tob kpo, bo kpa-e kak go Aijalon ji li ndi nyi Sebulon.

¹³ Eji Elon kpo no, Abdon mmon no Hilel ji lohng go Piraton, bomo Isreel go ellame.

¹⁴ Á bele abon atahl abal ba nlum, abon abon ebe jolo eltahl abon awubu, bo jo kuumu go ebvankang bi jolo atahl ara ewubu. Á lame Isreel go nnya enehkeni.

¹⁵ Abdon mmon no Hilel kehm kpoko, bo kpa-e kak go Piraton ji li go Efrem, ejahbe ewong ji anebe Amalek.

13

Ana wo bo jele Samson

¹ Anebe Isreel kehm kpe lim ab'bi go esamahr bi Jehova, á kehm faake bo kak Filisia go abo, go nnya atahl abal.

² Nne awohng jolo go no bo kpo lung-e re Manoa, á lohng go Sora ji li go elwo Dan. Nkal ewe jolo ngum, mmon awohng awohng á jelem.

³ Efung abehng enjel nyi Jehova kehm lohngo ba go ege kehm ba tong-e re, "A li ngum, mmon awohng awohng a kpimm. A bahke sake ela jel mmon no nlum.

⁴ Ka wo amahm ewoko woko, jol ejum elwoko ajehng ajehng ji kpo lim, ka tob li ejum ajehng ajehng ji ki li saang,

⁵ tibre a bahke sake ela jel mmon no nlum. A nehm kun-e elsem go ege esi, tibre bo bahk-e rodo kak Esowo go ebo. Bomo efung bi bo jel-e no, bo bahke koko nwongo re á bahke jolo eje eje ka Esowo. Á bahke tahre Isreel yehke go abo nya Filisia."

⁶ Nnenkal noa kehm soro mehl song kpiri nlum we, kehm-e tongo re, "Nne Esowo awohng baa ba kpir-m, á jolo are enjel nyi Esowo nyi, nne l'seeng-e á bahke bele elfahle. We m bahbem edi ji á lohng no ba, jol mbing enye á me-e tongem.

⁷ Á bungu aname re, 'A bahke sake ela jel mmon no nlum. Bomo anv asongo, ka tiki wo

amahm ewoko woko, a ejum ajehng ajehng ji ma mang ji bo kpo wo, fvfo ka tiki li ejum ji ki li saang, tibre mmon no nlum no a bahke jele bahke jolo mmon no bo ma lim nwongo re bo bahk-e rodo á jol eje eje ka Esowo, bomo go efung bi bo bahk-e jele tete á kpo.' "

⁸ Owo Manoa kehm kake ero tong Jehova re, "Nsoo, n kp-a gboongo , lub lim nne Esowo noo kpe feere ba, ba tib-r ana e bahke fili mmon noa no e bahke jele."

⁹ Esowo kehm faange Manoa. Enjel nyi Esowo kehm kpe ba kpiri nnenkal noa eji á li go egbe. Manoa nlum we jolem o a ne.

¹⁰ Nnenkal noa kehm beke song lung nlum re, "Nne no ba tiing-m etib nyanjehle, yeb kpe ba."

¹¹ Manoa kehm feere toono nkal, ba kpiri nnenlum noo, kehm-e bahbe re, "Wo ba bung a nkal ewame nyanjehla?" Á kehm faange Manoa re, "Me wo."

¹² Manoa kehm-e bahbe re, "Anv, alum nya a ma-r tong l'lohko jol ano, e bahke jo fili mmon noa renan, eltum anii á bahke jo lim?"

¹³ Enjel nyi Jehova kehm faange Manoa re, "Lim eji nkal ewa l'toono ajehng ajehng ana m me-e tong."

¹⁴ Á k'tiki li ejum ajehng ajehng ji lohng go nlehke avain, á k'wo amahm amehng amehng, afi ejum ajehng ajehng ji ma mang, jol á k'li ejum ajehng ajehng ji ki li saang. Nong á tiki bum ajehng ajehng ji n tong-e re á bum.

¹⁵ Manoa kehm bungu tong enjel nyi Jehova re, "Ji a wahr tohko song wul mbul, lam nsol ka-a."

16 Enjel nyi Jehova kehm-e faange re, "Jol afi a bob-m na bum a, n nehm tiki li ejum alehke eja. A l'fere toobo re wo lim njom nyi bo kpo jahm na fi, lim ka Jehova."

17 Manoa kehm bahbe enjel nyi Jehova re, "Mbing enya mee? Eji ejum ji a ma-r tong l'jol ano e l'kpun-a."

18 Owo enjel nyi Jehova kehm-e tongo re, "N'nan a kp'bahbe mbing enyame, n l'tong-a a nehm kahn."

19 Manoa kehm koko mombul, a ayare nya nkohl, kehm song lim njom go ekpartal ka Jehova. Jehova limi nkpokosi ejum ji Manoa abola nkal jo seenge:

20 Ana agun jo lohng go edi njom, mehle tortor ton esi go elbung, enjel nyi Jehova tob mehl toono ebliki agun asongo go elbung. Eji Manoa a nkal nyehne ano bo gboko kohk asamahr ebo go ndi.

21 Eji enjel nyio ki kpe feere ba goji Manoa abola nkal, owo Manoa ba kahn re enjel nyi Jehova nyi.

22 Manoa kehm tongo nkal ewe re, "E bahke kpokao, tibre wahr ebnyehn Esowo!"

23 Owo nkal kehm-e faange re, "Li re Jehova sebe re á wul-r, kehn á jolem koko ayare nya bo kpo jahm fi, a nya nkohl go egahre abo, jol á wahr jolem tibi nsol nyia, fere tob tong-r nsol nyia."

24 Nnenkal noo kehm jele mmon no nlum, kehm-e kake mbing re Samson. Mmon noo kehm gbale, elfuulu ni Jehova jolo a ne.

25 Etohko ji Jehova kehm kehme ellimi eltum go ege elkpun eji á jolo go Mahane Dan, go elka elka no Sora abola Estaol.

14

Elbal ni Samson

¹ Efung abehng, Samson je go Timna, song nyehn ngbahme, á jolo nne a Filisia.

² Eji Samson feere ba rehng etahk, á ba tongo nde abola nnyehn re, "Me n nyehn mmon a Filisia no nkal go Timna, koon ye ka-m, á jol nkal ewame."

³ Nde abola nnyehn kehm-e faange re, "Anv, nnenkal awohng awohng a nyehnem go ellong akunu enyahre, a ane ebahre kpeea? Jenji wahnge a bahke tahme goji anebe Filisia ba k'l'yehke nrur song seb nkal? Samson kehm tongo nde re, "Ko-e ka-m, ye wo n kpe-e sebe."

⁴ (Jol nde abola nnyehn kahnem re Jehova kp'sebe na mbang nyi á bahke koko ntong ba ka Filisia, tib ngare nyio bo ba jo fili Isreel).

⁵ Samson tahme go Timna, a nde, go nnyehn, eji bo rehngedi egbe agreb ji anebe Timna. Owo egabe kehm ba kehme elnoko a Samson.

⁶ Ngare ny'nehm o, Etohko ji Jehova kehm ba yel-e fere ka-e nsahm á kehm jabbe egabe yare abo abo, are á yare mombul. Jol nde abola nnyehn a tongem bo ji á ma lim.

⁷ Eji Samson song rehng go Timna, á kehm song bung a nnenkal. Samson nnenkal noo jo kor-e kor.

⁸ Eji ma kang abon afung, á kehm feere re á song lim elbal ebo, á kehm yange go ekul re á song nyehn ekpav egabe jio. Á song nyehne ekon ma yel o, bi ma lim akehng,

⁹ á sa o kehme, rod abo song raabe akehng ekon jo yab mbang mbang. Eji á song kpiri nde abola

nnyehn, á kehm tob ka bo, bo yab. Á tongem bo re akehng ekon mao lohng go ekpaky egabe.

¹⁰ Ana nde tahme song kpiri nnenkal, ano wo Samson song lim elkak ana eljini ajangkun jolo no ngare nyi bo kp'limi elbal ebo.

¹¹ Eji Samson ba no anebe Timna ka-e eltahl atem awubu ba bahke jo jen a ne.

¹² Samson kehm bungu re, Tong-m wahn ana elgan nia lohngo no. N' l'tong-m go nfung esehma nyi elkak nia bahke jolo, m bahk-n kake eltahl ebahn ebwubu, a eltahl a mbomo ewubu.

¹³ N' tohkem ma tong ana lohngo no, m bahk-m kake eltahl ebahn ebwubu, a eltahl ajoobo abomo ewubu. Bo kehm-e tongo re, "Tong-r elgan ena."

¹⁴ Á kehm bungu re, "Nsol alehke eblohng goji nne no kpo li, go etahntahn edi nnyebeyebe ejum eblohng." Go nfung era kohro kohro, bo maam tiki kahn ana lohngo lohng.

¹⁵ Eji ma biingi nfung eni, bo kehm tongo nkala Samson re, "Leebe nlum wa á tong-a, wo ba tong-r elgan ni á tong-r no. Tohko jol ano e bahk-a fehke a ane kpee ba li go etahk nso. Anv, n' tiing-r na elkak re wahr ba gbo ekpaka?

¹⁶ Owo nkala Samson kehm bake a abonngo go amahr, kehm tongo nlum re, "N wa nehme kor, n kp-a sabe! Wob tub ane ebame elgan, m-e a tong-m ana lohngo no. Á kehm-e faange re, "Jol nsoo abola nnee n ka tong bo, jengi wahnge m bahk-a tongo?"

¹⁷ Ano ano wo nkal jo ling go nfung esehma nyi elkak nio. Es'kohro efung bi biingi nfung esehma á kehm-e tongo tibre á gbiing-e sehng. Ano wo á

feere no song tong ane ebe.

¹⁸ Ntuumu nyi elgung es'kohro efung bio, afono ejahbe bao kehm ba tong-e re, "Ejum aji kp'yebe sehng e akehng ekon? Jenji kp'tahne sehng e egabe? "Samson kehm bungu tong bo re, "Ki li re wahn, a nne no li badbad a name, kehn n m-e jolem ma tong ana elgan ename lohngo no."

¹⁹ Etohko ji Jehova kehm ba yeke fere kansahm, á kehm song rehng go Askelon, song wul eltahl ane awubu go ejahbe jio, fere taare bo nsol ebo kpee. Á koo abomo ane bao, ba ka ane ba tong-e ana elgan nio lohngo no. Eji ma jol ano, rake Samson atahng sehng, á soro mehl o kehng e tahk nde.

²⁰ Nkala Samson bo rod-e ka ekpondahme Samson ji jolo o elkak.

15

Samson song bongo anebe Filisia

¹ Eji ma kang abon afung ntiil, ngare nyi kpo banne nkohl, Samson kehm rodo mmona mbul, tahm re á song nyehn nkal ewe. Á tongo nde nkal re á kp'sebe re á song kang a nkal ewe. Nde nkal taamem.

² Nde nkal kehm-e tongo re, "N tiri re, á wa nehme kor, n rod-e ka ekpondahme eja. Nyehn mmonannyehn no nse, ye wo kp'gaka nob, feere wo ba ko ye go elbal."

³ Samson kehm bungu re, "Anv, Nnene m-e nehm ma ka ebi ajehng ajehng, n l'lim Filisia ebi."

⁴ Samson kehm lohngo song bob mbehr atahlku, jabbe ebbal ebbal go eboa nsil kanne, á tob jo gbade nkahr semme go eboa nsil ebal ebal.

⁵ Á kehm kake agun go nkahr nyio, fere yake bo, bo jo be go atahng egbe nkohl ji anebe Filisia. Ano wo á limi no fi nkohl nyi anebe Filisia kpee wohng go ndi, a nya bo gba agan agan. Bo tob ranng ebgbe agreb, a ebgbe oliv kpee.

⁶ Anebe Filisia kehm bahbe re, "Nne awo limi ejum jia?" Bo kehm faange bo re, "Samson wo, ye ji ko mmon no nne a Timna, tibre bo m-e taare nkal ka nte ewe. Anebe Filisia kehm tahme song jahm nnenkal noo, a nde fi go agun.

⁷ Samson kehm bungu tong bo re, "Eji m ma lim ana, n nehm tiki rahke tete m bong-n kpee biing-m."

⁸ Á mehle a egburu erakatahng song nok a bo, wul ane gbalee. Á mehle song woomo go nkpaltal nyio go Etam.

⁹ Anebe Filisia kehm ba bum elsi ebo go Juda, bo nyange elsi ebo rehng go Lehi.

¹⁰ Anebe Juda kehm bahbe anebe Filisia re, "Jenji wahngé m ma ba elnoko a nahre?" Bo kehm faange bo re, "E ba re wahr ba bob Samson, fere bong-e ana ji á ma-r lim."

¹¹ Ane atahltahl nkpel esehma, ane atahl awubu ba Juda kehm tahme song kpiri Samson go nkpaltal nyi jolo go ewong ji Etam. Bo tongo Samson re, "Á nehme kahn re Filisia ji kp-r fila? Jenji a kp-r limi ana?" Samson kehm faange bo re, "Elbongo ni m bongo bo."

¹² Bo kehm tongo Samson re, "E ba re wahr ba gba-a, rod-a song faake kak anebe Filisia go abo." Samson kehm bungu re, "Nyamen tong-m re, wahn m-e nehm wul antahng."

¹³ Bo kehm-e faange re, "E wa nehm wul, e bahk-a gbake na gba abo, faak-a kak bo abo." Bo kehm gbake Samson go alehke nfenfe na abal, lohng a ne go nkpaltal nyio.

¹⁴ Eji anebe Filisia ba rehng a Samson go Lehi, bo kehm kimi abohk, jo rabe ana bo m-e bel. Etohko ji Jehova kehm ba ko nji go ege elkpin ba ka-e eko. alehke nya bo gba-e no kehm geebe are ngbakehrebo nyi, lohng-e go abo gbo.

¹⁵ Á kehm soro lamme rod elyar mbvankang nyi noongo go ndi, nyi bo kpehn-e wulu, wul ane atahltahl nkpel ebal atahl awubu ba Filisia.

¹⁶ Samson kehm bungu re, "A elyar eny' nya go egame ebo, me n wul bo bum abim abim. A elyar mbvankang me n ko wul ane atahltahl nkpel ebal atahl awubu."

¹⁷ Eji á ma bung ano kpee mal, á kehm roko elyar mbvankang nyio go. Bo gungu edi jio mbing re, Ramat-Lehi. (ji lohngo re ewong elyar nnyam)

¹⁸ Eji alahb m-e kor, á kehm rabe lung Jehova re, "Wob nok ebta bia sehng go abo nya nlokeltum ewa. Any, me n kpo ekor lahba, fooro yel abo ane ba k'l'yehke nrura?"

¹⁹ Jehova kehm limi alahb lohng go elbing anehng go Lehi, ana Samson wo no , ano wo á feere bel eko ana wuku wuku. Bo jo lungu elbing alahb nio re En Hakore (lohngo re elbing alahb ni nne lingi no ane wuk).

²⁰ Samson lame Isreel go nnya eltahl, ngare nyio anebe Filisia ba jo fili edi.

Samson abola Delila

¹ Efung abehng Samson tahme song rehng go Gasa. Á song nne as'sa awohng soro bum elgang a ne.

² Etib kehm rehng anebe Gasa re Samson li o. Anebe Gasa kehm gbake elbo tooo bum nnyo amehng re bo song biiri go eti mbu jo sik-e. Bo jolo o soom atv atv mao kpee, jo bung re efunfu l'ba elseke, e bahk-e wulu.

³ Samson noongo o tete atv kul. Á kehm mehle song melle ati mbu nya ejahbe, ebbal ebbal, a mbil a mbil enye. Á melle kunu go ebahk, sol song kunu go ero ewong ji li mbuksong nyi Hebron.

⁴ Eji ma kang abon afung, Samson ba bele nnenkal go ejahbe ji jolo edamme ji bo kpo lung re Sorek. Bo jo lung-e re Delila.

⁵ Owo atubesi anebe Filisia kehm bungu tong Delila re, "Were Samson á tong-a edi ji eko eje behr no, eji e bahk-e ma ko elfono, fere gba-e, taare eko eje. Nne awohng awohng ewahre bahk-a kake ebahk asilva atahltahl nkpel ebal, ebahk atahlku.

⁶ Efung abehng Delila kehm tongo Samson re, "Tong-m ejum ji kpo ka-a elkohn eko ana jia, tob tong-m ana nne bahk-a ma gba ko-a elfono."

⁷ Samson kehm-e faange re, "A l'ko nlehke na esehma bi mbir mbir gba-m, m bahke fere jol ana nne noka noka."

⁸ Owo anebekul Filisia kehm koko alehke mbir mbir nyao na esehma ba ka Delila, á rod gba-e.

⁹ Ane biiri o ekp'kpa ajehng etahk jio. Delila kehm rabe, "Samson, anebe filista ma-a ba elbo bao! Samson tohngo na tohng alehke nyao were

na were go abo, are bo tono nlehke mio go agun. Edi ji eko eje behr no bo kahnem.

¹⁰ Delila kehm tongo Samson re, "Á kp-m koko na lim mbene, fere kp-m tongo afahnge. Titi anv, tong-m ana m bahk-a ma gba, fere ko-a elfono."

¹¹ Samson kehm-e faange re, "Bo l'gba-m alehke nfenfe nya bo kala k'ko gba ejum, m bahke jolo ana nne noka noka."

¹² Owo Delila kehm koko alehke nfenfe ba a nya ba gba-e. Eji ane ba biiri go ekp'kpa ana bo biiri ngare nyehko wuku Delila ma rabe, "Samson, anebe Filisia ma-a ba elbo bao." Samson tohng alehke nyao kiimi go ege abo are av nya.

¹³ Delila kehm bungu tong Samson re, "Tete rehng anv, a kp'limi na mbene aname, fere jo tong-m afahnge! Tong-m ana m bahk-a gbake . " Á kehm faange re, "A l'tahng alvsi na esehma fere fer go ejum ji bo kpo tub abomo, fere kahn ekud, m bahke jolo ana nne noka noka. Eji á jo lal, Delila kehm ba tahng alv asehma nyao fere tub,

¹⁴ fere kahn ekpud, bade go ejum, tub abomo baade tv. Owo Delila kehm kpe rabe lung-e, "Samson, anebe Filisia ma-a ba elbobao!" Á kehm yahme go ellu, wob nga nyio nyi bo baade alv esi tv go edi ji kpo tub abomo.

¹⁵ Delila kehm-e tongo re, 'Jenji wahnge a kp'bungu re, "N kp-a koro, eji a kalem tong nsol nyi behr-a go eltim? Anv, eblim nkpel era nyi a ma-m nehm. A ma-m ten eltongo edi ji egburu eko eja behr no.

¹⁶ Ano wo efung abehng abehng á jo gbiing-e

tete á lahng fere jo yam go ngb'gbiingi nyi á kp-e gbiingi.

¹⁷ Es'kohro Samson lennge ejum ajehng ajehng ka-e, kehm-e tongo re, "Alv esi enyame bo ka k'kiimi go esem. Tibre n li eje eje ka Esowo, bomo eji bo jel-m no. Bo l'kiimi alv esi enyame, eko ejame bahke lohngo. M bahke jolo ana ane baka baka."

¹⁸ Eji Delila sebe kahn re á me-e tong etingitingi, á kehm tumu etib tv atubesi Filisia re, "Kpe-n feere ba anv, á ma-m tong ejum ajehng ajehng. Ana bo ba no, bo ba a akpohko nya bo taame no.

¹⁹ Delila kehm were Samson lal-e go ayo. Á kehm lungu nne ba yel, no ba kpud-e alv esi enye, ano wo eko eje gbodo no, soro yak-e abo.

²⁰ Owo Delila kehm rabe re, "Samson anebe Filisia ma-a ba elbobao! Á nyahme kan a me, "Á kehm tiri re, a bahke lohngo ana á kpo kono ellohngo wuku wuku, gbehre eje for. Jol á tikem kahn re Jehova m-e yake abo.

²¹ Owo anebe Filisia kehm-e bobo, luud-e amahr, rod-e tahm go Gasa. Bo kak-e afarebok abrons go abo, fere bum-e á jo gok nsol go ngbekobo go eltal ngoko.

²² Eji ma abon afung, esi ji bo m-e kpud kehm kehme elkohdo.

Elkv ni Samson

²³ Atubesi Filisia kehm ba gba ji, ba lim egburu elkak ni bo bahke limi egburu njom ka Dagon ji jolo esowo ebo, fere geere re, "Esowo ebahre ebga Samson nnekv ewahre, faak-e kak-r go abo."

²⁴ Ana ane nyehn-e no bo kehm kehme esowo ebo tehk, fere jo bung re, "Esowo ebahre ebfaake nnekv ewahre kak-r go abo. Nne no wulu ane ebahre gbalee wob go egahre abo."

²⁵ Eji bo ma wo fere kp'bumu, bo bungu re, "Koon Samson ba a ne, á ba bahn ase ka-r wahr nyehn. Bo kehm yehke Samson go ngbekobo ba a ne, á ba kehme elbahne. Bo bum-e á yiimi kohlo ago.

²⁶ Samson kehm bungu tong nlokeltum no jabb-e ebo jo jen a ne re, "Tv-m me n song jabbe ago nya kp'tobo etahk elom jia."

²⁷ Ngare nyio anebelum, a anebkal anebkal, a atubesi Filisia kpee wob go etahk jia, go enyong bo jolo ane atahltahl nkpel esehma ane atahl awubu bo jo nyehne ana Samson kp'bahne ase tib bo.

²⁸ Samson kehm kake ero ka Ntula Jehova re, "Jehova, wo wo ga kpi nsahm, kpe-m buumu nkpel nyia, kpe-m ka atahne nkpel nyia nyi nyi, eji n l'bongo anebe Filisia go esi amahr enyame."

²⁹ Samson kehm nyange abo enye jabbe ago nya etahk elom jia kun no. Á jabbe ego jehko go eboblum, jehka ebobkal.

³⁰ Á kehm bungu re, "Nong me n kpo a anebe Filisia!" Á kehm nyaame ago nyao, etahk jio gbo bulu abafili ane a ane bao kpee ba wob go atahng. Go ege elkv wo á ga wul ane sehng ana á jolo go elkpín.

³¹ Abonanyehn, a ebangenahb nde kpee kehm ba rod ngubjing enye tahm a nyi kehngé. Bo song kpa-e kak go elka elka ni Sora abola Estaol, kohlo

elahm nde Manoa. Á fili Isreel nnya atahl abal.

17

Elokelom ji Maika

¹ Nne awohng no bo lung-e re Maika, á lohng go ewong ejahbe ji Efrem,

² á bungu tong nnyehn re, <<Me wo rodo abahk asilva atahltahl nkpel ebal atahlku nyao nya a jo su re bo ma-a v, nyaa go egame." Nnyehn kehm bungu re, "Jehova fuula mmon ewame."

³ Eji á feere asilva nyao ba ka nnyehn, nnyehn kehm bungu re, "N bahke faake asilva nyaa kpee ka Jehova tib esi mmon ewame. M bahke rodo lim asowo, konngo a silva feere a nya ba ka-a."

⁴ Maika feere asilva nyao song ka nnyehn. Nnyehn kehm rodo abahk asilva atahl awubu ka nfohkotahl, á kehm koko lim asowo fere konngo asilva. Bo rodo asowo nyao bum go etahk Maika.

⁵ Maika limi ekahnlom, á tob limi nkpehrekabe ewobo ji njomanjom kpo kak, fere lim asowo. Á rodo mmon ewe awohng re á jol nlimanjom.

⁶ Ngare nyio, Isreel ntul bo belem, nne awohng awohng jo limi ji kpe-e koro.

⁷ Ngare ny'nehm o njankun anyehng jolo go nyi lohng go et'tohng ji Levi, á lene go Betlehem ji li go Juda.

⁸ Á mehle Betlehem re á song seb edi jindiki lene. Ana á kp'jene mbang mbang asongo, á kehm ba rehng go etahk Maika ji li go ejahbe ewong ji Efrem.

⁹ Maika kehm-e bahbe re, "Gan wo a lohng no kp'bake a?" Á kehm faange Maika re, "Me nne

no lohng go et'tohngo ji Levi wo, ejahbe ejame Betlehem ji li go Juda ji. N kp'sebe edi ji m bahke lene."

¹⁰ Maika kehm bungu tong-e re, "Jol a name a, wo jol nsoo, a nlimanjom ewame. Go elya m bahk-a kake akpohko asilva na ebwubu, a nsol alehke, go nsol elkake nyi ngubjing."

¹¹ Njangkun nyia nyi lohng go et'tohngo ji Levi ba taame re á bahke lene a ne. Á jolo a ne are mmon ewe wo.

¹² Maika kehm rodo njangkun nyia á jol nlimanjom ewe, á lene o etahk Maika.

¹³ Maika kehm bungu re, "N kp'kahne re, Jehova bahke limi nsol nob a name, tib nnea Levi noa ebba jol nlimanjom ewame."

18

Elsi ni anebe Dan bumu go Lais

¹ Ngare nyio Isreel ntul bo belem. Et'tohngo ji Dan jo sebe re, bo bel edi ellene, tibre ngare nyio bo ka tiki bel edi ndi ji bo ellong at'tohngo nya Isreel.

² Anebe Dan kehm tumu atakuru ane na alon ba lohng go Sora abola Estaol re bo song weele kpur edi ji bo bahke song lene. Ane baa jolo go esi enyo ebangenahb ebo. Bo yele go ejahbe ewong ji Efrem, kehm ba rehng go etahk ji Maika fere kang o.

³ Re bo kehm rehng go etahk Maika, bo liingi ellum ni njangkun nyio nyi lohng go et'tohngo ji Levi, ano wo bo yange go etahk jio. Bo rod-e feere a ne go nkpe, kehm-e bahbe re, "Nne awo ko-a ba a? Jenji a kp'limi edi jia? Jenji wahnge a li li a?"

⁴ Á kehm ba tong bo bade ana Maika m-e bum, anv ye wo li nlimanjom no Maika.

⁵ Bo kehm bungu tong-e re, "Bahb Esowo, joare eljen enahre nia bahke nobo, afi nehm nob."

⁶ Nlimanjom noo kehm faange bo re, "Songen soom, Jehova bahk-n gboko mbang."

⁷ Atakuru ane alon bao kehm mehle ba rehng go Lais, edi ji bo ba kpiri ane ba jolo elkpín nehka nehka jol ejumjum joom lub bo, ana anebe Saidon. Ntong anyehng anyehng kpeem jol. Bo jolo go elkoono kpee sennge bo kak. Bo jolo afangane, tibre bo bele nvemma ndi nyi jo lak nsol. Tob jolo re bo jolo fee, jol bo kpidem Sidon, afi bel ekpakebjing ajehng ajehng a ane ba jolo kpídi kpídi.

⁸ Eji bo feere no ba rehng go Sora, a Estaol, abonanyehn kehm bahbe bo re, "Nsol go jolo renan?"

⁹ Anebelum bao kehm bungu re, "Wahr noken a bo! Wahr ebyehn re ndi nyia kp'nobo. Kana laange, e tahmen song koon edi jio.

¹⁰ Nl'rehng o, rí bahke nyehne ane kp'limi nsol nyi kpi bo kor, ejumjum kpehme lub bo. Esowo ma-r ka nvemma ndi nyia, elehng ajehng ajehng e limm."

¹¹ Owo ane atahltahl atahl awubu ba lohng go et'tohng ji Dan kehm kake nsol ebta. Bo lohng go Sora, a Estaol.

¹² Bo bumu elsi ebo go erede bi Kiriát-Jearim ji li go Juda. Owo wahnge bo kpo lung edi jio re Mahane Dan tete rehng lela.

¹³ Bo kehm mehle o tahm go ejahbe ewong ji Efrem sehng song rehng go etahk Maika.

¹⁴ Atakuru ane alon bao, ba song feede ndi go Lais kehm bungu tong ane bako re, "N' kp'kahne re, etahk ejehng go ntahk nyia kpi ebulungang ji nlimanjom kpo kak, a abon asowo, go ji bo limi go eti, a ji bo mongo na. E kp'kahne ana e bahke limi."

¹⁵ Ane bao na alon kehm tahme go etahk ji Maika, edi ji njangkun nyia nyi lohng go et'tohngo ji Levi lene no song kak-e nnyo.

¹⁶ Ana atakuru ane bao, ane atahltahl atahl awubu ba lohng go et'tohngo ji Dan yim go alatahk,

¹⁷ atakuru ane alon ba song feede edi kehm ye le go ekahnlom song rod elokelom, a ebulungang jio, alokelum nya li ka ebangenahb, a elokelom jehko ji bo mongo na. Ngare nyio, nlimanjom, a ane atahltahl atahl awubu ba fili nsol ebta yim go mbuga.

¹⁸ Eji nlimanjom noo nyehne ana bo kp'rodo elokelum go etahk Maika ji bo rahme na, a ebulungang a asowo nyako nya li ka ebangenahb, a elokelom jehko ji bo mongo na, á kehm bungu re, "Jenji n' kp'limi a?"

¹⁹ Bo kehm-e tongo re, "Bulu nnyo, wo tahm toon-r! Ba jol nsoo, a nlimanjom ewahre. Anv jinji ga nob! re wo jol nlimanjom ka et'tohngo kohro kohro, afi wo jol ka nne awohng?"

²⁰ Nlimajom noo bele eyebatahng sehng. Á rodo ebulungang ji nlimanjom, a elokelom ji bo rahme na, tahm toono ane bao.

²¹ Bo rodo abon ebo, a ntokondi ebo, a nsol nyi bo kpi no bum go mbuksong, sennge elbo tahm.

²² Eji bo ma lohng go etahk Maika jen mmokv

ntiil, owo ane ba lene kohlo etahk Maika kehm fohko elbo, kehm kehme anebe Dan kam.

²³ Ana bo kp'rabe jo toono bo go nnaahb, owo anebe Dan kehm sennge bung tong Maika re, "Jenji wahng ka a ma lung ane eba re bo ba nok anahre?"

²⁴ Á kehm faange bo re, "Wahn ebrod asowo enyame nya n limi no, a nlimanjom ewame fi a ne. Jenji kpe-m li go abo? N'nan n kp-m bahbe re, 'Jinji kp-a kake elgbiingi?' "

²⁵ Anebe Dan kehm bungu re, "Jo kunen ekpu ejum ji n kp'bungu. Ane ba kpo rak atahng sohksokh li egahre ellong. Bo bahke ma rak atahng ba wul-a, a ebangenahb eja."

²⁶ Anebe Dan soro asi go eljene asongo. Eji Maika nyehne re ane bao kp'tahne sehng-e, á feere eje kehng-e ege etahk.

²⁷ Bo rodo asowo Maika, a nlimanjom ewe song rehng go Lais re bo song nok a bo ji ki jo seb atong, bo belem ebaabe ebjing. Bo song noko a bo, wul bo kpee, fere jamme ntahk ebo fi.

²⁸ Nnene jolem no bahke tahre bo. Bo jolem kohlo Saidon, jol ekpakebjing ajehng ajehng bo belem a nne awohng awohng. Ejahbe jio jolo go edamme kohlo Bet-Rehob. Anebe Dan tuungu ejahbe jio si, fere lene o.

²⁹ Bo fere gungu ejahbe jio mbing re Dan ana bo jo lung nde bo, ye ji Isreel (Jekob) jel-e no. Ejahbe jia wuku wuku bo lungu re Lais.

³⁰ Anebe Dan kehm limi egudu ji bo kunu asowo, Jonatan mmon no Gesom ji jolo mmon no Mosis, a abon ebe ba jolo abalimajom ka et'tohngo ji Dan, tete ngare nyi bo rodo bo tahm

eju.

³¹ Bo soro asi jo rod alokelom nyaa nya Maika ma lim, ngare kpe kpe nyi etahk Esowo jolo go Silo. kake asowo nyaa nya Maika limi no, eji etahk Esowo jolo go Silo.

19

Nnea Levi, a nne elkang ewe

¹ Afung nyao Isreel ntul bo belem. Nne awohng jolo go no lene go ejahbe awong ji Efrem. Á lohng go et'tohngo ji Levi. Á ko nne elkang awohng go Betlehem ji Juda ba a ne.

² Nnenkal noo joom kpunu nlum mbang anyehng anyehng. Á be nlum sa, feere song kehng go etahk nde ji li go Betlehem ji Juda. Eji ma kang ejum nnyahng eni,

³ nlum we kehm tahme re á song ko-e feere a ne. Á je a aloketum ebe, bo fili mbvankang ebal. Nnenkal kehm ba wan-e go mbang, fere ko-e song yel a ne go eksp'kpa nde, eji nde nyehn-e no, atahng yebe sehng.

⁴ Nde nnar, nde no mmonse nkal jo sebe re á kang a bo, á sa a bo o nfung era, ano wo á jo li, jo wo, fere jo noongo lal.

⁵ Eji ma rehng nfung eni, á kehm mehle efunfu behre behre re á tahm, nde nkal kehm-e tongo re, "Tohko li nsol wo kehm tahme."

⁶ Bo ane abal abal kehm ba ji edi ajehng li nsol fere jo wo. Nde nnenkal kehm-e tongo re, "Kpe kang atv amehng a nahre, wo li fere jo geere."

⁷ Ana á mehle re á tahm, ano wo nde nkal kpanne no re á kang, á fere kang atv mao.

⁸ Efunfu behre behre bio bi biingi nfung elon, á kpe mehl re á tahm, ano wo nde nkal kpe-e kpanne re, "Tohko li nsol, eman eji nnv ma ren wo kehm tahme. Ano wo bo kpe ji li nsol edi ajehng.

⁹ Eji nnenlum noo, a nne elkang ewe, a nloketum no nnenlum noo mehle re bo tahm, nde nkal kehm kpe bung tong nlum a mmon re, "Nyehn ga elgung yahke ba, kang a wo li nsol a nahre, efunfu behre behre wo mehl kehng."

¹⁰ Eji nnenlum noo bumu go ege eltim re á nehm kpe kang, á mehle asongo go Jebus (ji li Jeusalem), a ebvankang ebe na abal bi solo nsol, a nne elkang ewe.

¹¹ Eji bo yahke ba elrehng go Jebus, atv yahke behde, owo nlokeltum ewe kehm bungu tong nde re, "Nong wahr kangen go ejahbe jia atv maa."

¹² Owo nde kehm-e faange re, "E nehm kang a, ejahbe ji ane ebahre Isreel ki li. E bahke tahme go Gibeá."

¹³ Á kpe bung re, "Nong wahr noken rehng go Gibeá, afi Rama song kang go."

¹⁴ Bo kehm mehle asongo. Njul kp'lahme ngare nyi bo kp'rehng go Gibeá, ji li go ndi nyi Benjamin.

¹⁵ Ana bo rehng Gibeá, bo sebe re bo kang o. Bo kehm mehle song ji go elatahkgur nne ne jolem no vvrv bo kak go ebo ntahk.

¹⁶ Elgung nio nk'kula nnenlum awohng no jo kehng elimijum, á lohng go ejahbe ewong ji Efrem. Á lene o Gibeá, ji jolo ejahbe ji et'tohngo Benjamin.

¹⁷ Eji á nyehne ajenne nyao, á kehm bahbe bo

re, "N gan wo n lohng no? N gan wo n kp'tahme?"

¹⁸ Á kehm faange bo re, "E lohng go Betlehem ji li go Juda, e kp'tahme go ejahbe ewong ji Efrem, edi ji n lene no. N je go Betlehem ji li go Juda, anv, n fi go Etahk Esowo. Nne ne limm no ma-m vvrv kak go ege etahk.

¹⁹ Wahr kpi amahm, a nsol nyi e bahke lehke, go nsol nyi mbvankang bahke lehke, fere noongo lal. E nehme seb ejum ajehng ajehng.

²⁰ Nnenkul noo kehm tongo bo re, "Baan, wahn ba kang go egame. M bahk-n kake ejum ajehng ajehng ji n li elehng. Mbang anyehng anyehng, kana kang go alatahkgur."

²¹ Á kehm rodo bo tahm go ge etahk. Nfontahk ka abvankang ebo nsol alehke. Eji á ma ru bo akpade, á kehm koko nsol alehke ba, bo li egom egom.

²² Ana bo jehk no kp'lehke nsol, ab'bi ane ba li ejahbe jio kehm ba sennge etahk jio kak. Bo jo ruumu mbutahk, fere jo rabe tong nnenkul noo re, "Ko nnenlum no ma ba a ega etahk wahr noongo a ne."

²³ Nnenkul noo kehm lohngo ba kpiri bo go alatahk, kehm bungu tong bo re, "E,ee, ate ebame, kana lim elkohn ebi ejum ana jia, nne noa njenne enyame nyi, bahke jolo ejum esono.

²⁴ Nyehnen mmon ewame no li mongunga nnenkal, a nnelkang ewe, m bahke koko bo ba ka-n. Lim-n bo ajehng ajehng ji kp-n koro. Kana lim nnenlum noa ejum ajehng ajehng."

²⁵ Jol anebelum baa we wuungem atung. Owo nnenlum no lohng go et'tohngo ji Levi kehm

yehke nnelkang ewe ka bo go alatahk, bo noongo a ne atv mao kpee. Eji efungfu ma se, bo nyehk-e yake.

²⁶ Ana efungfu kp'seke, ano wo nnenkal noo feere ba rehng etahk ji nnelkang nde ewe jolo no, kehm ba fooro gbo go egudu mbutahk, sa noongo o tete edi gohro bang.

²⁷ Eji nnelkang ewe mehle ba lennge mbu lohngalatahk mi á yahke soro asi go ege eljen, á kehm ba nyehn nnelkang ewe no nkal nong go mbutahk, á ma tub ejahm go mbu.

²⁸ Á kehm-e tongo re, "Mehl yiimi, wahr tahm." Jol ellum go nnyo we lohngem. Á kehm-e tubu ejahm, rod-e kunu go njahm edonki, tahm a ne kehng.

²⁹ Eji á song rehng go etahk, á kehm rodo ntahme kiimi nnelkang ewe bum go ewubu ejang ebbal. Á kehm yehke ngabe anyehng anyehng tum tv et'tohngo Isreel ajehng ajehng.

³⁰ Nne awohng awohng no nyehne no bungu re, "Elkohn ejum ana jia ka j'jol go Isreel, bomo go ngare nyi Isreel lohngo go Ijib. Keren bade ejum jia. Tooben, wahn ba tong-r ji e bahke limi."

20

Abohng nya anebe Isreel a anebe Benjamin

¹ Owo Isreel kpee, bomo go Dan tete song rehng go Beseba, bo ji tob lohng go Gilied, kehm ba kono a eltim anehng. Bo ba kpee go Mispa, ba yiimi go esamahr bi Esowo.

² atubesi ba Isreel go at'tohngo ebo kpee kehm lohngo, bo jolo atahntahn ane. bo jolo go nfange

ane atahltahl nkpel atahltahl nkpel ebal atahl awubu(400,000), bo rodo nkahngkahng ebo ba ji go ebo a nji go esamahr bi Esowo.

³ (Anebe Benjamin ba wuku re at'tohngo Isreel nyako kpee ebrehng go Mispā.) Owo anebe Isreel kehm bungu re, "Tong-r ana ejum jia jolo jol."

⁴ Nne a Levi no jolo nnelkang a nnenkal noa no bo wul-e no kehm bungu re, "Me, a nnelkang ewame ba rehng go Gibeā ji jolo go Benjamin re wahr ba kang o atv.

⁵ Nlum atv, anebe Gibeā kehm ba senngē etahk ji n jolo no kak, a ntir re bo wul-m. Bo bobo nnelkang ewame noongo a ne, á ma kpo.

⁶ N kehm ba rod ngubjing enye kiimi akv akv, tum tv et'tohngo ajehng ajehng ji li go Isreel, tibre bo limi ejum esono jia, go elwo ni Isreel.

⁷ Anv, wahn anebe Isreel kpee lohngen wahn bung ana ejum jia bahke jolo."

⁸ Owo ane kpee kehm mehle bung bum nnyo amehng re, "Nnene go egahre ellong limm, afi jolo re á wob go ebkpatahk, afi fere jolo go etahk no bahke feere go ege etahk.

⁹ Anv ji e bahke limi anebe Gibeā ji a, a bahke tubu elfange, kahn nne no bahke gboko mbang song bohk-e abohng.

¹⁰ Et'tohng ajehng ajehng ji kpi ane atahl alon bahk-r kake anebelum awubu; Et'tohngo ji kpi ane atahltahl nkpel ebal ane atahl awubu bahk-r kake anebelum atahl alon; Et'tohngo ji kpi ane rehng ane atahltahl go eltahl a nkpel elon, bahk-r kake anebelum atahltahl nkpel ebal ane atahl awubu. Ane baa ba bahke jo ko nsol alehke, a

nsol nyehko ba ka nsoja. Wahr ji ma sa e bahk-n tahme go Gibe a ji li go Benjamin song bongo bo go elkohn ebi ejum ana jia ji bo ma lim go Isreel."

¹¹ Ano wo Isreel kpee taame bum nnyo amehng, re bo nok a ejahbe jio.

¹² At'tohngo nyaka nya Isreel kpee kehm tumu etib tv et'tohng ji Benjamin rea, "Elkohn eb'bi ajii, ji bo ma lim go egahne ellong?

¹³ Faaken abi ane bao ka-r, eji e l'wul bo, eji eb'bi jia l'k'kpe jol go elwo ni Isreel." Jol anebe Benjamin faangem bo.

¹⁴ Ji bo limi no jolo re, bo lohng na go ebo ajahbe, ba rehng go Gibe a re bo ba nok a Isreel.

¹⁵ Bo jolo ane atahltahl nkpel atahl ara a nkpel elon, ba lohngo go et'tohngo ji Benjamin bo ji fili nkahngkahng, ba budu a ane atahltahl atahlku bo ji ma bel elnere abohng anoko ba lene go Gibe a.

¹⁶ Ane atahltahl atahlku bao ba Benjamin jolo ane ba jo lim abobkal, bo bahke ma ro eltal tub ejum ajehng ajehng afi jolo ana ellv esi jol nehm foro go nkpe.

¹⁷ A l'yehke anebe Benjamin, Isreel jolo ane atahltahl go nkpel atahltahl nkpel ebal atahl awubu, ba jolo atakuru ane.

¹⁸ Anebe Isreel je go Betel song bahb Es-owo. Bo bahbe re, "Et'tohngo ajii bahke gboko mbang bohko anebe Benjamin ebta?" Jehova kehm faange re, "Juda wo bahke gboko mbang."

¹⁹ Efunfu behre behre anebe Isreel kehm mehle song kak elsi ebo kohlo Gibe a.

²⁰ Owo Isreel lohngo jo song nok a anebe Benjamin, bo yiimi aji nta ebo jo nok a bo go

Gibea.

²¹ Anebe Benjamin ba lohngo go Gibea wulu ane atahltahl nkpel atahl abal tahlku, ba anebe Isreel efung bio.

²² Anebe Isreel kehm kake atemtem eltim, kpe lohng eji ji bo yiimi no nyaane.

²³ Bo mehle tahm go Betel song yiimi go esamahr Esowo jo ling tete elgung ba. Bo song bahbe Jehova re, "Wahr song nok a anebe Benjamin abonanee ejahra?" Jehova kehm faange bo re, "Song noken a bo."

²⁴ Anebe Israel kehm kpe lohng song nok a anebe Benjamin go etoono efung.

²⁵ Efung bia eji anebe Benjamin kpe ba kehme elnkok, bo kpe wul ejum ane atahltahl nkpel atahl abal a nkpel elon ba Isreel, bo kpee jolo atahntahn ane ba jo fili nkahngkahng.

²⁶ Owo Isreel kpee kehm go Betel song kehme ellingi go esamahr bi Jehova, bade elbo njal tete rehng go elgung. Bo tob limi ajomjom, nya bo kpo jahm fi, a nya elkoono ka Jehova.

²⁷ Anebe Isreel bahbe Jehova. (Ngare nyio elkohl atahm jolo o,

²⁸ Finehas mmon no Eliesa, ye ji jolo mmon no Eron, ye wo jo lim njom ngare nyio.) Bo kehm bahbe re, "Wahr song noken a anebe Benjamin abonanee ebahra, afi wahr k'je?" Jehova kehm faange re, "Songen, behna m bahke faake bo kaken go abo."

²⁹ Anebe Isreel kehm tahme song biiri go eku-lugbe sennge Gibea kak.

³⁰ Bo kehm mehle ebta bia efung bi biingi nfung era re bo song nok a anebe Benjamin, song yiimi

go ebo adi ebta nya bo kpo kono elyiimi re bo nok a Gibeal.

³¹ Eji anebe Benjamin lohngo ba elnoko anebe Isreel, anebe Isreel jo feere njahmjahm, tohng bo yehke go ebo ejahbe. Ana bo jo kono ellimi, bo kpe kehme anebe Isreel wul ana jolo nyanjehle. Mbang mbang nyio nyi Betel, a Gibeal, bo wulu eltahl ane awubu ba Isreel.

³² Ana nsoja nyi anebe Benjamin kp' bungu re, "Wahr ebkpe kehme bo wul ana nyanjehle." Anebe Isreel kp' bungu re, "E feeren njahmjahm, eji e l'tohng bo yehke go ebo ejahbe feere go esi mbang."

³³ Eji anebe Isreel mehle go aji nya bo jolo no song rehng go Baal Tema, owo ane ba biiri go ekul kehm mehle go erede bio bi Gibeal.

³⁴ Atakuru nsoja nyi ga tahne nyi Isreel, bo jolo ane atahltahl go eltahl a nkpel elon mehle mbuksong ebta a anebe Gibeal. Abohng tahne sehng, jol anebe Benjamin tikem kahn re, efung bia ebi efung bi ka bo.

³⁵ Jehova kake Isreel ebo eji bo jo nok a anebe Benjamin. Efung bio anebe Isreel wulu ane atahltahl nkpel atahl ara a nkpel ebal a ane atahlku ba Benjamin. Bo kpee jolo ane ba kpo fili nkahngkahng.

³⁶ Anebe Benjamin lohko nyehn re Isreel eb-sehng bo. Anebe Isreel jo be njahmjahm go esamahr bi anebe Benjamin, tib ekunukpu ebo jolo go eji ane ba biiri go ekulugbe jio ji Gibeal.

³⁷ Ane bao ba biiri go ekulugbe kehm lohngo go aji nya bo behr no, ba wul nne awohng awohng no li go Gibeal go nkahngkahng.

³⁸ Anebe Isreel toobo a ane ba biiri go ekulugbe re bo jahm ejahbe jio fi, bo nyehn at'tohk go eji ji bo li no,

³⁹ jio bahke tob lim anebe Isreel yiimi fere jo nok a bo. Ngare nyia anebe Benjamin ebkpe wul anebe Isreel (ejum eltahl ane awubu), bo soro kehme elbungu re, "E kp'gake bo ana nyanjehle."

⁴⁰ Eji at'tohk ma tohko nti asongo go elbung nya kp'lohngo go ejahbe jio, owo anebe Benjamin kehm keebe nyehn ana at'tohk kp'lohngo go ebo ejahbe asongo go elbung.

⁴¹ Anebe Isreel ba jo be njahmjahm kehm feere jo nok a anebe Benjamin. Ngare nyia nyi anebe benjamin liingi re eb'bi ejum yahke lim bo.

⁴² Bo kehm kehme elbeke go esamahr bi Isreel asongo go elka emahng, bo maam for go ebta bia. Anebe Isreel kehm lohngo go ebo ejahbe ba kehme bo wul go elka emahng.

⁴³ Anebe Isreel sennge anebe Benjamin kak, fere jo kam bo asongo asongo, bo kehm song bob bo go ero nfam nyio nyi Gibeaa.

⁴⁴ Ane atahltahl nkpel atahl abal a nkpel elon ba Benjamin, ba jolo atahntahn ane ba kpo ebta bia.

⁴⁵ Ana bo jo be asongo go eltal ni Rimon ni jolo go elka emahng. anebe Isreel wulu ejum ane atahltahl nkpel ewubal ane atahl awubu mbang mbang. Ano wo bo soro asi jo kam anebe Benjamin tete rehng go Gidom, wul ane atahltahl nkpel elon kpe budu.

⁴⁶ Efung bio ane atahltahl nkpel atahl ara a nkpel ebal a atahl awubu ba Benjamin ba kpo fili nkahngkahng kpo go ebta, bo kpee jolo atah-

ntahn ane.

⁴⁷ Ane atahltahl atahl awubu be rehng go elka emahng song yel go nkpaltal nyi Rimon, bo jolo o nnyahng eni.

⁴⁸ Anebe Isreel feere sehng song rehng go Benjamin. Bo wulu nne awohng awohng go ekahng kahng. Bo wulu, a enyam enyam kpee, a ejum ajehng ajehng ji bo nyehne no. Ejahbe ajehng ajehng ji bo yele no bo jo jahm fi.

21

Anebe Isreel sebe mbang nyi bo bahke sebe akal ka anebe Benjamin

¹ Anebe Isreel ebko nwongo, ngare nyi bo jolo go Mispá: "Nnene nehm tiki ka nne a Benjamin mmon ewe no nkal go elbal."

² Bo kpee je go Betel, song ji go esamahr Esowo song rabe aling wahre wahre tete elgung ba.

³ Bo lingi rea, "Jehova, wo li Esowo bi Isreel, jenji wahng ka jia ma lim Isreel? Jenji wahnge et'tohngo ajehng ma tan go egahre ellong lela?"

⁴ Etoono efung, efungfu behre behre, bo kehm limi njom nyi bo kpo jahm fi, a nyi elkoono.

⁵ Anebe Isreel kehm bahbe elbo re, "Nne awoo go at'tohngo nya Isreel no ki lohng ba go esamahr bi Jehova." Tibre bo ko nwongo go re, nne awohng awohng no tohko lohng ba go esamahr Jehova go Mispá, bo bahk-e wulu.

⁶ Anv, erakatahng ji Isreel, tib esi ji anebe Benjamin ji abonanyehn. Bo kehm bungu re, "Lela et'tohngo ajehng kpeem li go Isreel.

⁷ Eji e ma ko nwongo go esamahr Esowo re wahr k'ka bo abon ebahre ba nkal go elbal. Ane ba ma sa e bahke limi renan kehm kake bo akal?"

⁸ Bo kehm bahbe re, "Nne awoo ki ba go at'tohngo nya Isreel, ba ji go esamahr Jehova eji e je go Mispa?" Bo ba seb kahn re nne ne go Jabes Gilied lohngem ba.

⁹ Eji bo fange nrur ane, bo sebe kahn re nne ne lohngem go Jabes Gilied ba.

¹⁰ Owo nkon nyi anebe Isreel kehm tumu ane atahltahl nkpel eltahl, a nkpel ewubu abanok-abohng a elle re, bo song wul nne awohng awohng no li o go ekahngkahng, anebkal, a abon abon kpee.

¹¹ Bo bungu tong bo re, "Ji ji a, ji rn bahke limi. M bahke wulu nnenlum awohng awohng, wahn tob wul nnenkal awohng awohng no ma sahb nne."

¹² Go Jabes Gilied bo bele ane atahltahl ba kala sahb ane, bo ko agungu anebkal bao kpee ba go Silo ji jolo go ndi nyi Kenan.

¹³ Anebe Isreel tumu anebe elkoono tv anebe Benjamin go nkpaltal nyi Rimon re bo rahke ebta.

¹⁴ Anebe Benjamin kehm feere, bo kehm kake bo anebkal ba bo ki wul bo, jol anebkal bao biingem bo.

¹⁵ Jo gbiingi anebe Isreel sehng, tibre Esowo eblim re eyake jol ji nne ne ki li go at'tohngo nya Isreel.

¹⁶ Owo atubesi ba Isreel kehm bahbe re, "Any, eji e ma wul anebkal ba et'tohngo ji Benjamin kpee, nnenkal awohng awohng kpeem li no e bahke kake anebe Benjamin, e bahke limi renan

kehm sebe anebkal ka bo.?

¹⁷ Bo kehm bungu re, "Anebe Benjamin ba sa no bahke tiki bel abon eji et'tohngo l'k'tan go Isreel.

¹⁸ Wahr nehm ma ka bo abon ebahre re bo jol akal ebo, eji wahr Isreel ma ko nwongo nyio: Elsu bahke jolo ka nnea Isreel no bahke kake nne no lohng go et'tohngo ji Benjamin nkal.

¹⁹ Bo kehm bungu re, "Elkak ni e kpo lim-n go elya elya ka Jehova go Silo ebkabbe, "Silo li ejang ebobkal bi Betel, a ejang eboblum bi Lebona, a l'lohng go Betel kp'tahme Sekem, Silo li ero nfam."

²⁰ Bo kehm tubu anebe Benjamin elle re, "Songen, wahn song biiri go ebgbe agreb bi li go mbang,

²¹ wahn jo kpur. Abonse nkal ba lohng go Silo l'lohng ba semme anahne jo bahn ase, lohngen go edi ji n behr no, no nne ba tub mmonse nkal no bahke jolo nkal ewe ejahm go ellong abonse nkal ba lohng go Silo, wahn be abo tahm go edi nyi Benjamin.

²² Babnde, a abonanyehn ebo l'ba bahr-r, e bahke tongo bo re, 'Tib-r nnoobo eljini, wahn kak bo ebo, tibre nnenkal awohng awohng e belem ka bo ngare ebta. Ebi ejahne sang, eji n ki ka bo abon ebahne ba nkal.' "

²³ Ano wo anebe Benjamin limi no. Ngare nyi abonse nkal kp'bahne ase, no nne bahke beke song tub mmonse nkal awohng ejahm tahm a ne re á song jol nkal ewe. Owo bo kehm feere go eji elehkelkv ebo song tuungu ejahbe ebo si, fere lene o.

²⁴ Ngare nyio anebe Isreel kehm yake edi jio,

feere kehnge go ebo ejahbe, no nne feere go edi elehkelkv eje.

²⁵ Ngare nyio ntul awohng awohng jolem go Isreel, nne awohng awohng jo limi ji jo kor-e.

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4